



AN COIMISIÚN
EORPACH

An Bhruiséil, 7.12.2015
COM(2015) 613 final

ANNEXES 1 to 10

IARSCRÍBHINNÍ

a ghabhann leis

an togra le haghaidh

RIALACHÁN Ó PHARLAIMINT NA hEORPA AGUS ÓN gCOMHAIRLE

maidir le rialacha comhchoiteanna i réimse na heitlíochta sibhialta agus lena mbunaítear Gníomhaireacht Sábháilteachta Eitlíochta na hEorpa, agus lena n-aisghairtear Rialachán (CE) Uimh. 216/2008 ó Pharlaimint na hEorpa agus ón gComhairle

{SWD(2015) 262 final}

{SWD(2015) 263 final}

IARSCRÍBHINN I

Aerárthaí dá dtagraítear in Airteagal 2(3)(d)

Catagóirí aerárthaí nach bhfuil feidhm ag an Rialachán maidir leo:

- (a) aerárthaí stairiúla a chomhlíonann na critéir thíos:
 - (i) aerárthaí simplí:
 - ar bunaíodh a gcéad-dearadh roimh 1 Eanáir 1955 agus
 - ar éiríodh as a bheith á dtáirgeadh roimh 1 Eanáir 1975nó
 - (ii) aerárthaí a bhfuil tábhacht shoiléir stairiúil leo, agus a mbaineann an méid seo a leanas leo:
 - go raibh siad rannpháirteach in imeacht stairiúil iomráiteach,
 - gur céim mhór chun tosaigh i bhforbairt na heitlíochta a bhí i gceist leo, nó
 - go raibh ról tábhachtach acu i bhfórsaí armtha Ballstáit;
- (b) aerárthaí arna ndearadh nó arna modhnú go sonrach chun críocha taighde, turgnaimh nó eolaíochta agus ar cosúil nach dtáirgfear ach líon an-teoranta díobh;
- (c) aerárthaí ar thóg amaitéarach nó comhlachas neamhbhrabúsach amaitéarach ar a laghad 51 % díobh chun a gcríoch féin agus gan aon chuspóir tráchtála a bheith acu;
- (d) aerárthaí a bhí i seirbhís fórsaí míleata, ach amháin gur cineál aerárthaí iad ar ghlac an Ghníomhaireacht caighdeán deartha lena n-aghaidh;
- (e) eitleáin a bhfuil luas moillithe nó íosluas eitle seasta i gcumraíocht tuirlingthe acu nach sáraíonn 35 mhuirmhíle de luas aeir calabraithe (CAS) agus nach bhfuil níos mó ná dhá shuíochán iontu chomh maith le heitleáin, héileacaptair agus paraisiúit chumhachtaithe nach bhfuil níos mó ná dhá shuíochán iontu agus a bhfuil uasmhais éirí de thalamh (MTOM) acu, arna taifeadadh ag na Ballstáit, nach mó ná:
 - (i) 300 kg i gcás eitleán talún/héileacaptar talún aon suíocháin;
 - (ii) 450 kg i gcás eitleán talún/héileacaptar talún dhá shuíochán;
 - (iii) 330 kg i gcás amfaibiaigh nó i gcás eitleán snámha/héileacaptar snámha aon suíocháin;
 - (iv) 495 kg i gcás amfaibiaigh nó i gcás eitleán snámha/héileacaptair dhá shuíochán, ar choinníoll, i gcás ina mbeidh sé ag feidhmiú mar eitleán snámha/héileacaptar agus mar eitleán talún/héileacaptar araon, go mbeidh a mhais faoi bhun dhá theorainn MTOM araon, más iomchuí;
 - (v) 472,5 kg i gcás eitleán talún dhá shuíochán atá feistithe le córas olltarrthála paraisiúit ar aerfhráma;
 - (vi) 540 kg i gcás eitleán talún dhá shuíochán atá feistithe le córas olltarrthála paraisiúit ar aerfhráma agus le córas tiomána leictreach;
 - (vii) 315 kg i gcás eitleán talún aon suíocháin atá feistithe le córas olltarrthála paraisiúit ar aerfhráma;

- (viii) 365 kg i gcás eitleán talún aon suíocháin atá feistithe le córas olltarrhála paraisiúit ar aerfhráma agus le córas tiomána leictreach;
- (f) gíreitleáin aon suíocháin agus gíreitleáin dhá shuíochán a bhfuil acu uasmhais éirí de thalamh nach sáraíonn 560 kg;
- (g) faoileoirí agus faoileoirí cumhachtaithe nach mó ná 250 kg a n-uasmhais éirí de thalamh i gcás faoileoirí aon suíocháin nó nach mó ná 400 kg a n-uasmhais éirí de thalamh i gcás faoileoirí dhá shuíochán, lena n-áirítear faoileoirí a sheoltar de chois;
- (h) macasamhlacha aerárthaí a chomhlíonann na critéir i bpointí (a) nó (d) agus ar cosúil leis an aerárthach bunaidh a ndearadh struchtúrach;
- (i) balúin the aontaistealaí nach mó ná 900 m³ a dtoirt aeir the dheartha uasta;
- (j) aon aerárthach foireannaithe eile nach mó ná 70 kg a uasmhais fholamh, lena n-áirítear breosla.

IARSCRÍBHINN II

Ceanglais fhíor-riachtanacha maidir le haeracmhainneacht

1. SLÁINE TÁIRGE:

Ní mór sláine táirge a áirithiú i leith na ndálaí eitilte uile a bhfuil coinne leo i gcaitheamh shaolré oibríochtúil an aerárthaigh. Ní mór a léiriú trí mheasúnú nó trí anailís go bhfuil na ceanglais ar fad á gcomhlíonadh agus tástálacha mar thaca leo, más gá.

1.1. Struchtúir agus ábhair:

1.1.1. Ní mór sláine an struchtúir a áirithiú ar fud imchlúdach oibríochtúil an aerárthaigh, agus lasmuigh de ar bhealach leordhóthanach, lena n-áirítear a chóras tiomána, agus í seo a chothabháil i rith shaolré oibríochtúil an aerárthaigh.

1.1.2. Ní mór gach páirt den aerárthach, a bhféadfadh a cliseadh sláine struchtúrach an aerárthaigh a laghdú, na coinníollacha seo a leanas a chomhlíonadh gan dífhoirmiúchán díobhálach ná cliseadh. Folaíonn sé sin na hítimí uile a bhfuil toirt shuntasach iontu maille lena modhanna srianta.

(a) Ní mór na teaglamaí ualaí uile a bhféadfaí bheith ag súil leo go réasúnta laistigh, agus lasmuigh ar bhealach leordhóthanach, de mheáchain, de raon meáchanláir, d'imchlúdach oibríochtúil agus de shaolré an aerárthaigh a chur san áireamh. Folaíonn sé sin ualaí a eascraíonn as séideáin, ainlithe, brúcháirí, dromchlaí inaistrithe, córais rialaithe agus tiomána, san aer agus ar an talamh araon.

(b) Ní mór aird a thabhairt ar na hualaí agus ar aon chliseadh is dócha a tharlódh, de bharr tuirlingtí éigeandála ar tír nó ar uisce.

(c) Más iomchuí de réir an chineáil oibríochta atá i gceist, ní mór éifeachtaí dinimiciúla a fholú sa fhreagairt struchtúrach ar na hualaí seo, agus méid an aerárthaigh chomh maith lena chumraíocht á gcur san áireamh.

1.1.3. Ní mór an t-aerárthach a bheith saor ó aon neamhchobhsaíocht aerleasteach agus ó aon chreathadh iomarcach.

1.1.4. Ní mór airíonna struchtúracha aitheanta agus inatáirgthe a theacht as na próisis mhonarúcháin agus as na hábhair a úsáidfear chun an t-aerárthach a thógáil. Ní mór míniú a thabhairt ar aon athrú ar fheidhmíocht ábharach a bhfuil baint ag an timpeallacht oibríochtúil leis.

1.1.5. Ní mór a áirithiú, a oiread agus is féidir, nach laghdóidh i gcás éifeachtaí na lódála timthriallaí, an díghrádaithe timpeallachta, an damáiste de bharr tionóiscí agus an damáiste de bharr foinsí discréideacha, nach laghdóidh siad an tsláine struchtúrach faoi bhun leibhéil nirt iarmharaigh inghlactha. Ba cheart gach treo air a riachtanach d'fhonn aeracmhainneacht leanúnach a áirithiú i ndáil leis sin a fhógairt.

1.2. Tiomáint:

1.2.1. Ní mór sláine an chórais tiomána (i.e. an t-inneall agus, más iomchuí, an lián) a léiriú ar fud imchlúdach oibríochtúil an chórais tiomána, agus lasmuigh de ar bhealach leordhóthanach, agus an tsláine sin a chothabháil i gcaitheamh shaolré oibríochtúil an chórais tiomána, agus ról an chórais tiomána maidir le coincheap foriomlán sábháilteachta an aerárthaigh á chur san áireamh.

- 1.2.2. Ní mór an córas tiomána, laistigh dá theorainneacha luaite, an sá nó an chumhacht a éileofar air a tháirgeadh faoi na dálaí eitilte uile atá riachtanach, agus tionchair agus dálaí comhshaoil á gcur san áireamh.
- 1.2.3. Ní mór iompraíocht struchtúrach aitheanta agus inatáirgthe a theacht as an bpróiseas monarúcháin agus as na hábhair a úsáidfear chun an córas tiomána a thógáil. Ní mór míniú a thabhairt ar aon athrú ar fheidhmíocht ábharach a bhfuil baint ag an timpeallacht oibríochtúil leis.
- 1.2.4. Ní mór a áirithiú nach laghdófar sláine an chórais tiomána faoi bhun leibhéal inghlactha de dheasca na héifeachta a bheidh ag lódáil thimthriallach uirthi nó, mar an gcéanna, ag díghrádú timpeallachta agus oibríochtúil uirthi nó ag cliseadh na gcomhpháirteanna is dócha a tharlódh ina dhiaidh sin. Ní mór gach treoir atá riachtanach d'fhonn aeracmhainneacht leanúnach a áirithiú i ndáil leis sin a fhógairt.
- 1.2.5. Ní mór gach treoir, gach faisnéis agus gach ceanglas is gá chun comhéadan sábháilte agus iomchuí a áirithiú idir an córas tiomána agus an t-aerárthach a fhógairt.

1.3. Córais agus trealamh (nach trealamh neamhshuiteáilte é):

- 1.3.1. Ní mór a áirithiú nach mbeidh aon ghnéithe deartha ná aon mhionsonraí deartha ag roinnt le haerárthach ar léir go bhfuil siad guaiseach ón taithí a fuarthas orthu go dtí seo.
- 1.3.2. Ní mór a áirithiú go bhfeidhmeoidh an t-aerárthach, lena n-áirítear na córais agus an trealamh sin is gá chun dearadh cineáil an aerárthaigh a mheas, nó a bhfuil gá leo de réir rialacha oibriúcháin, mar atá beartaithe, faoi aon dálaí oibríochtúla ar féidir coinne a bheith leo, ar fud imchlúdach oibríochtúil an aerárthaigh, agus lasmuigh de ar bhealach leordhóthanach, agus timpeallacht oibríochtúil an chórais nó an trealaimh á cur san áireamh go hiomchuí. Aon chórais nó aon trealamh eile nach bhfuil riachtanach do dheimhniúchán cineáil, nó de réir rialacha oibriúcháin, bídis ag feidhmiú i gceart nó ná bíodh, níor cheart go laghdóidís cúrsaí sábháilteachta ná níor cheart go mbeadh drochthionchar acu ar fheidhmiú ceart aon chórais nó aon trealaimh eile. Ba cheart go mbeadh córais agus trealamh inoibrithe gan gá a bheith ann le scil eisceachtúil ná le neart eisceachtúil.
- 1.3.3. Ní mór córais agus trealamh an aerárthaigh a dhearadh, arna meas iontu féin agus ó thaobh an ghaoil atá eatarthu, ionas nach dtarlódh cliseadh tromchúiseach de thoradh ar chliseadh aonair nár léiríodh gurbh fhíorbheag an seans go dtarlódh sé, agus ní mór coibhneas inbhéartach a bheith ann idir a dhóchúla atá sé go mbeidh drochbhail orthu as a n-eascródh cliseadh agus déine na héifeachta a bheadh aici sin ar an aerárthach agus ar na taistealaithe ann. Maidir leis an gcritéar um chliseadh aonair thuas, tuigtear gur gá méid agus cumraíocht ghinearálta an aerárthaigh a chur san áireamh más iomchuí agus go bhféadfadh sé sin comhlíonadh an chritéir um chliseadh aonair a chosc i gcás roinnt comhpháirteanna agus roinnt córas ar héileacaptair agus ar eitleáin bheaga.
- 1.3.4. Ní mór faisnéis atá riachtanach chun an eitilt a sheoladh go sábháilte agus faisnéis maidir le dálaí neamhshábháilte a chur ar fáil don fhoireann, nó do phearsanra cothabhála, más iomchuí, ar bhealach soiléir, comhsheasmhach agus neamhdhébhríoch. Ní mór córais, trealamh agus rialtáin, lena n-áirítear comharthaí agus fógraí, a dhearadh agus a shuiteáil ar bhealach a laghdódh líon na mbotún a d'fhéadfadh bheith ina gcúis guaise.
- 1.3.5. Ní mór réamhchúraimí maidir le dearadh a ghlacadh, laistigh agus lasmuigh den aerárthach, le guaiseacha a laghdú i leith an aerárthaigh agus na dtaistealaithe ó

bhagairtí a bhfuil seans réasúnta ann go dtitfidh siad amach, bagairtí don tslándáil faisnéise san áireamh, réamhchúraimí lena n-áirítear cosaint i gcoinne na féidearthachta go dtarlódh cliseadh suntasach i dtrealamh neamhshuiteáilte nó go ndéanfaí cur isteach ar aon trealamh neamhshuiteáilte.

1.4. Trealamh neamhshuiteáilte:

- 1.4.1. Ní mór trealamh neamhshuiteáilte an fheidhm sábháilteachta atá aige nó feidhm eile a bhaineann le sábháilteacht a chur i gcrích mar atá beartaithe, faoi aon dálaí oibríochtúla ar féidir coinne a bheith leo, ach amháin i gcás inar féidir an fheidhm sin a chur i gcrích ar mhodh eile.
- 1.4.2. Ba cheart go mbeadh trealamh neamhshuiteáilte inoibrithe gan gá a bheith ann le scil eisceachtúil ná le neart eisceachtúil.
- 1.4.3. Ní mór trealamh neamhshuiteáilte a dhearadh ar bhealach a laghdódh líon na mbotún a d'fhéadfadh bheith ina gcúis guaise.
- 1.4.4. Níor cheart go laghdódh trealamh neamhshuiteáilte cúrsaí sábháilteachta, bíodh an trealamh sin ag feidhmiú i gceart nó ná bíodh, agus níor cheart go mbeadh drochthionchar aige ar fheidhmiú ceart aon chórais, aon trealamh nó aon fhearaís eile.

1.5. Aeracmhainneacht leanúnach:

- 1.5.1. Ní mór na doiciméid uile is gá, lena n-áirítear teoracha i leith aeracmhainneacht leanúnach, a bhunú agus a chur ar fáil d'fhonn a áirithiú go gcoinneofar ar bun, i gcaitheamh shaolré oibríochtúil an aerárthaigh, an caighdeán aeracmhainneachta a bhaineann leis an gcineál aerárthaigh agus le comhpháirteanna an aerárthaigh sin.
- 1.5.2. Ní mór modhanna a chur ar fáil d'fhonn cigireacht, coigeartú nó bealú a dhéanamh ar chomhpháirteanna nó ar threalamh neamhshuiteáilte, nó comhpháirteanna agus trealamh neamhshuiteáilte a bhaint amach nó a athsholáthar de réir mar a bheidh gá leo d'fhonn aeracmhainneacht leanúnach a áirithiú.
- 1.5.3. Ní mór na teoracha i leith aeracmhainneacht leanúnach a bheith i bhfoirm lámhleabhair, nó lámhleabhar, más iomchuí do líon na sonraí a chuirfear ar fáil. Ní mór teoracha cothabhála agus deisiúcháin, agus faisnéis maidir le seirbhísiú, fabhtcheartú agus nósanna imeachta cigireachta, a chuimsiú sna lámhleabhair, i bhformáid a chuirfidh ar chumas duine socrú praiticiúil a dhéanamh.
- 1.5.4. Ní mór teorainneacha aeracmhainneachta a bheith áirithe sna teoracha i leith aeracmhainneacht leanúnach, teorainneacha lena leagtar amach gach tréimhse éigeantach athsholáthair, gach eatramh cigireachta agus gach nós imeachta cigireachta a ghabhann leis.

2. GNÉITHE AERACMHAINNEACHTA A GHABHANN LE HOIBRIÚ TÁIRGE

- 2.1. Ní mór a thaispeáint go ndearnadh an méid seo a leanas chun leibhéal sásúil sábháilteachta a áirithiú dóibh siúd atá ar bord nó ar an talamh agus an táirge á oibriú:
 - (a) Ní mór na cineálacha oibrithe dá bhfuil an t-aerárthach formheasta a leagan amach mar aon le teorainneacha agus faisnéis atá riachtanach lena oibriú go sábháilte, lena n-áirítear teorainneacha agus feidhmiú ó thaobh an chomhshaoil, a leagan amach.

- (b) Ní mór don aerárthach a bheith inrialaithe agus so-innealta go sábháilte faoi na dálaí oibríochtúla intuatha go léir lena n-áirítear i ndiaidh do cheann amháin de na córais tiomána cliseadh, nó, más iomchuí, i ndiaidh do níos mó ná ceann amháin de na córais tiomána cliseadh, agus méid an aerárthaigh chomh maith lena chumraíocht á gcur san áireamh. Ní mór neart an phíolóta, timpeallacht na deice eitilte, ualach oibre an phíolóta agus dálaí eile a bhfuil gné dhaonna ag baint leo, chomh maith le céim na heitilte agus fad na heitilte, a chur san áireamh go hiomchuí.
 - (c) Ní mór bheith in ann aistriú réidh a dhéanamh ó chéim eitilte amháin go céim eitilte eile gan leibhéal eisceachtúil scile píolótachta, aireachais, nirt ná ualaigh oibre a bheith de dhíth faoi aon cheann de na dálaí oibríochtúla is dócha a bheadh ann.
 - (d) Ní mór a oiread cobhsaíochta a bheith san aerárthach agus a áiritheoidh nach mbeidh na héilimh a dhéanfar ar an bpíolóta iomarcach, agus céim na heitilte chomh maith lena fad á gcur san áireamh.
 - (e) Ní mór nósanna imeachta a bhunú le haghaidh gnáthoibríochtaí, cliseadh agus coinníollacha éigeandála.
 - (f) Ní mór foláirimh nó iombhagairtí eile a sholáthar atá ceaptha le cosc a chur le sárú an ghnáth-imchlúdaigh eitilte más iomchuí don chineál aerárthaigh atá i gceist.
 - (g) Ní mór airíonna an aerárthaigh agus a chórais a cheadú go bhféadfaí filleadh go sábháilte ó dhálaí foircneacha imchlúdach na heitilte a d'fhéadfadh teacht ina bhealach.
- 2.2. Ní mór na srianta oibríochta agus aon fhaisnéis eile atá riachtanach chun eitilt a oibriú go sábháilte a chur ar fáil do na comhaltaí foirne.
- 2.3. Ní mór oibríochtaí táirge a chosaint ó ghuaiseacha a eascróidh as dálaí seachtracha dochracha agus dálaí inmheánacha dochracha, lena n-áirítear coinníollacha comhshaoil.
- (a) Thar aon rud eile, agus más iomchuí de réir an chineáil oibríochta atá i gceist, níor cheart go dtiocfadh aon staid bhaolach as neamhchosaint ó fheiniméin a mbeifí ag súil leo go réasúnta agus táirge á oibriú, feiniméin amhail drochaimsir, tintreach, imbhualadh éin, réimsí radaithe ardmhinicíochta, ózón, etc., ach gan a bheith teoranta dóibh sin amháin, agus méid an aerárthaigh chomh maith lena chumraíocht á gcur san áireamh.
 - (b) Ní mór d'urranna cábáin, más iomchuí de réir an chineáil oibríochtaí atá i gceist, dálaí oiriúnacha iompair a chur ar fáil do phaisinéirí chomh maith le cosaint iomchuí ó aon ghuais a mbeifí ag súil léi le linn oibríochtaí na heitilte nó de thoradh ar staideanna éigeandála, lena n-áirítear tine, deatach, gáis nimhiúla agus guaiseacha de thoradh ar dhí-chomhbhrú mear, agus méid an aerárthaigh chomh maith lena chumraíocht á gcur san áireamh. Ní mór socruithe a dhéanamh chun gach seans réasúnta a thabhairt do thaistealaithe gortú tromchúiseach a sheachaint agus an t-aerárthach a fhágáil go tapa agus chun taistealaithe a chosaint ó éifeacht na bhfórsaí luasmhoillithe i gcás tuirlingt éigeandála ar muir nó ar tír. Ní mór comharthaí nó fógraí atá soiléir agus gan athbhrí iontu a chur ar fáil, más gá, le hoiliúint a chur ar thaistealaithe maidir le hiompraíocht iomchuí shábháilte agus maidir le láthair agus

ceartúsáid an trealamh sábháilteachta. Ní mór teacht a bheith go héasca ar an trealamh sábháilteachta atá riachtanach.

- (c) Ní mór urranna na foirne, más iomchuí de réir an chineáil oibríochtaí atá i gceist, a bheith socraithe chun oibríochtaí eitilte a éascú, lena n-áirítearfeasacht staide a chur ar fáil, agus chun aon staid nó aon éigeandálaí a bhfuiltear ag súil leo a bhainistiú. Ní mór timpeallacht urranna na foirne a bheith socraithe ar bhealach nach gcuirfeadh as do chumas na gcomhaltaí foirne a gcuid cúraimí a chur i gcrích agus caithfidh dearadh na n-urrann a bheith déanta ar bhealach a sheachnódh aon chur isteach ar oibríochtaí agus ar mhí-úsáid na rialtán.

3. EAGRAÍOCHTAÍ (LENA N-ÁIRÍTEAR DAOINE NÁDÚRTHA A THUGANN FAOI DHEARADH, FAOI MHONARÚ NÓ FAOI CHOTHABHÁIL)

3.1. Más iomchuí don chineál gníomhaíochta atá i gceist, ní mór formheasanna eagraíochta a eisiúint nuair a chomhlíontar na coinníollacha seo a leanas:

- (a) caithfidh na hacmhainní uile is gá le haghaidh raon feidhme na hoibre a bheith ag an eagraíocht. Orthu sin beidh na hacmhainní seo a leanas, cé nach iad seo amháin a bheidh ann: áiseanna, pearsanra, trealamh, uirlisí agus ábhar, doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead.
- (b) Más iomchuí de réir an chineáil gníomhaíochta a dhéanfar agus mhéid na heagraíochta féin, ní mór don eagraíocht córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha sin, go ndéanfar rioscaí sábháilteachta a bhainistiú agus go bhféachfar leis an gcóras sin a fheabhsú go leanúnach.
- (c) déanfaidh an eagraíocht socruithe a bhunú le heagraíochtaí ábhartha eile, más gá, chun a áirithiú go gcomhlíonfar na ceanglais aeracmhainneachta fhíor-riachtanacha sin go leanúnach.
- (d) déanfaidh an eagraíocht córas tuairiscithe tarluithe a bhunú mar chuid den chóras bainistíochta faoi phointe (b) agus na socruithe faoi phointe (c), d'fhonn cur leis an iarracht cúrsaí sábháilteachta a fheabhsú go leanúnach. Beidh an córas tuairiscithe tarluithe i gcomhréir le Rialachán (AE) 376/2014.

3.2. Ní bhaineann na coinníollacha faoi phointí 3.1(c) agus 3.1(d) le heagraíochtaí oiliúna cothabhála.

IARSCRÍBHINN III

Ceanglais fhíor-riachtanacha maidir le comhoiriúnacht chomhshaoil táirgí

1. Ní mór táirgí a dhearadh ionas go ndéanfaidh siad a laghad torainn agus is féidir, agus pointe 4 á chur san áireamh.
2. Ní mór táirgí a dhearadh sa dóigh go laghdófar ar astaíochtaí oiread agus is féidir, agus pointe 4 á chur san áireamh.
3. Ní mór táirgí a dhearadh ionas go laghdófar ar na hastaíochtaí sin a eascraíonn as galú leachtanna nó sceitheadh leachtanna, agus pointe 4 á chur san áireamh.
4. Ní mór na comhbhabhtálacha sin idir bearta deartha atá ceaptha le laghdú a dhéanamh ar thorann, ar chineálacha éagsúla astaíochtaí agus ar sceitheadh leachtanna a chur san áireamh.
5. Réimse iomlán na ngnáthdhálaí oibríochtúla agus na limistéar geografach, ina dtagann torann nó astaíochtaí an aerárthaigh i gceist, cuirfear san áireamh iad nuair a bheidh leibhéil torainn agus astaíochtaí á laghdú.
6. Córais agus trealamh sin an aerárthaigh atá riachtanach chun an comhshaoil a chaomhnú, ní mór iad a dhearadh, a tháirgeadh agus a chothabháil sa chaoi go bhfeidhmeoidh siad, mar atá beartaithe, faoi aon dálaí oibríochtúla ar féidir coinne a bheith leo. Ní mór a n-iontaofacht a bheith leordhóthanach don éifeacht a cheaptar a bheidh acu ar chomhoiriúnacht chomhshaoil an táirge.
7. Aon treoracha, nósanna imeachta, acmhainní, lámhleabhair, srianta agus cigireacht atá riachtanach chun a áirithiú go gcomhlíonfaidh táirge eitlíochta na ceanglais fhíor-riachtanacha seo go leanúnach, ní mór iad a bhunú agus a chur ar fáil d'úsáideoirí an táirge sin ar bhealach soiléir.
8. Ní mór do na heagraíochtaí sin atá rannpháirteach i ndearadh, i dtáirgeadh agus i gcothabháil táirgí eitlíochta:
 - (a) na hacmhainní uile a bheith acu is gá lena áirithiú go gcomhlíonfaidh táirge eitlíochta na ceanglais fhíor-riachtanacha; agus
 - (b) socruithe a bhunú le heagraíochtaí ábhartha eile, más gá, chun a áirithiú go gcomhlíonfaidh táirge eitlíochta na ceanglais fhíor-riachtanacha seo ar bhonn leanúnach.

IARSCRÍBHINN IV

Ceanglais fhíor-riachtanacha maidir le foireann eitilte

1. OILIÚINT PÍOLÓTAÍ

1.1. Ginearálta

Ní mór do dhuine a bhfuil oiliúint á cur air nó uirthi chun aerárthach a eitilt a bheith chomh haibí ó thaobh oideachais, coirp agus meabhrach de agus go mbeidh sé nó sí in ann an t-eolas ábhartha teoiriciúil agus an scil phraiticiúil a shealbhú, a choinneáil ar bun agus a thaispeáint.

1.2. Eolas teoiriciúil

Ní mór do pháilóta leibhéal eolais a shealbhú agus a choinneáil ar bun a oireann do na feidhmeanna a chuirtear i gcrích ar an aerárthach agus atá i gcomhréir leis na rioscaí a bhaineann leis an gcineál gníomhaíochta atá i gceist. Maidir leis an leibhéal eolais sin, ní mór cuid de na réimsí seo a leanas a bheith cuimsithe ann:

- (a) dlí an aeir;
- (b) eolas ginearálta faoi aerárthaí;
- (c) ábhair theicniúla a bhaineann le catagóir an aerárthaigh;
- (d) feidhmiú agus pleanáil eitilte;
- (e) feidhmiú an duine agus na teorainneacha atá leis;
- (f) meitéareolaíocht;
- (g) loingseoireacht;
- (h) nósanna imeachta oibríochta, lena n-áirítear bainistíocht acmhainní;
- (i) prionsabail na heitilte;
- (j) cumarsáid; agus
- (k) scileanna neamhtheicniúla, lena n-áirítear bagairtí agus earráidí a aithint agus a bhainistiú.

1.3. Eolas teoiriciúil a thaispeáint agus a choinneáil ar bun

1.3.1. Ní mór a thaispeáint go bhfuil eolas teoiriciúil á shealbhú agus á choinneáil trí mheasúnú leanúnach le linn na hoiliúna agus, más iomchuí, trí scrúduithe.

1.3.2. Ní mór leibhéal iomchuí inniúlachta a choinneáil ar bun i dtaca le heolas teoiriciúil. Ní mór a thaispeáint go bhfuil sé sin á chomhlíonadh, trí mheasúnuithe rialta, scrúduithe rialta, tástálacha rialta nó seiceálacha rialta. Maidir le rialtacht na scrúduithe, na dtástálacha nó na seiceálacha sin, ní mór iad a bheith i gcomhréir leis an leibhéal riosca a bhaineann leis an ngníomhaíocht.

1.4. Scil phraiticiúil

Ní mór do pháilóta scileanna praiticiúla a shealbhú agus a choinneáil ar bun más iomchuí chun a chuid feidhmeanna nó a cuid feidhmeanna a chur i gcrích ar an aerárthach. Ní mór na scileanna sin a bheith i gcomhréir leis na rioscaí a ghabhann leis an gcineál gníomhaíochta atá i gceist agus caithfidh siad, i gcás ina n-oireann do na feidhmeanna a chuirtear i gcrích ar an aerárthach, an méid seo a leanas a chuimsiú:

- (a) gníomhaíochtaí roimh eitilt agus le linn na heitilte lena n-áirítear feidhmiú an aerárthaigh, mais agus cothromaíocht an aerárthaigh a chinneadh, cigireacht agus seirbhísiú a dhéanamh ar an aerárthach, pleanáil breosla nó pleanáil fuinnimh, breithiúnas ar an aimsir, pleanáil bealaí, srianta ar aerspás agus fáil ar rúidbhealaí;
- (b) oibríochtaí aeradróim agus oibríochtaí patrúin tráchta;
- (c) réamhchúraimí agus nósanna imeachta maidir le himbhualadh a sheachaint;
- (d) aerárthach a rialú trí amharcthagairt sheachtrach;
- (e) ainlithe eitilte, lena n-áirítear ainlithe i suímh chriticiúla, agus ainlithe 'suaiteachta' gaolmhara, de réir mar is féidir iad a chur i gcrích go teicniúil;
- (f) gnáthéirí de thalamh agus éirí de thalamh trasghaoithe chomh maith le gnáth-thuirlingtí agus tuirlingtí trasghaoithe;
- (g) eitilt gan mar thagairt ach uirlisí, más iomchuí don chineál gníomhaíochta atá i gceist;
- (h) nósanna imeachta oibríochta, lena n-áirítear scileanna foirne agus bainistíocht acmhainní, más iomchuí don chineál oibríochta atá i gceist, cibé acu oibríocht aon fhoireann nó oibríocht ilfhoirne í;
- (i) loingseoireacht agus cur chun feidhme rialacha an aeir agus nósanna imeachta gaolmhara, agus feidhm á baint chucu, más iomchuí, as amharcthagairt nó as áiseanna loingseoireachta;
- (j) oibríochtaí neamhghnácha agus oibríochtaí éigeandála, lena n-áirítear mífheidhmeanna trealaimh aerárthaí ionsamhalta;
- (k) comhlíonadh nósanna imeachta seirbhísí aerthráchta agus cumarsáide;
- (l) cineál aerárthaí nó gnéithe sainaicme;
- (m) oiliúint bhreise i scileanna praiticiúla a d'fhéadfadh a bheith ag teastáil chun na rioscaí a bhaineann le gníomhaíochtaí sonracha a mhaolú; agus
- (n) scileanna neamhtheicniúla, lena n-áirítear bagairtí agus earráidí a aithint agus a bhainistiú, trí mhodheolaíocht leordhóthanach measúnaithe a úsáid i dteannta an mheasúnaithe ar scileanna teicniúla.

1.5. Scil phraiticiúil a thaispeáint agus a choinneáil ar bun

1.5.1. Ní mór píolóta a thaispeáint go bhfuil sé ina chumas nó ina cumas na nósanna imeachta agus na hainlithe a fheidhmiú leis an méid inniúlachta is iomchuí do na feidhmeanna a chuirtear i gcrích ar an aerárthach, tríd an méid seo a leanas a dhéanamh:

- (a) an t-aerárthach a oibriú laistigh dá theorainneacha;
- (b) dea-bhreithiúnas agus dea-eitleoireacht a fheidhmiú;
- (c) eolas aerloingseoireachta a chur i bhfeidhm;
- (d) smacht a choinneáil ar an aerárthach i gcónaí sa dóigh go n-áirithítear toradh rathúil a bheith ar nós imeachta nó ar ainliú; agus
- (e) scileanna neamhtheicniúla, lena n-áirítear bagairtí agus earráidí a aithint agus a bhainistiú, trí mhodheolaíocht leordhóthanach measúnaithe a úsáid i dteannta an mheasúnaithe ar scileanna teicniúla.

- 1.5.2. Ní mór leibhéal iomchuí inniúlachta i scil phraiticiúil a choinneáil ar bun. Ní mór a thaispeáint go bhfuil sé sin á chomhlíonadh, trí mheasúnuithe rialta, trí scrúduithe rialta, trí thástálacha rialta nó trí sheiceálacha rialta. Maidir le rialtacht na scrúduithe, na dtástálacha nó na seiceálacha sin, ní mór iad a bheith i gcomhréir leis an leibhéal riosca a bhaineann leis an ngníomhaíocht.

1.6. Inniúlacht Teanga

Ní mór do phíolóta inniúlacht teanga a thaispeáint is iomchuí do na feidhmeanna a chomhlíontar ar an aerárthach. Folóidh an inniúlacht sin an méid seo a leanas:

- (a) bheith in ann doiciméid faisnéise aimsire a thuiscint;
- (b) bheith in ann cairteanna aerloingseoireachta faoi bhealach, cairteanna aerloingseoireachta imeachta agus cairteanna aerloingseoireachta tuirlingthe a úsáid mar aon le doiciméid faisnéise aerloingseoireachta ghaolmhara; agus
- (c) bheith in ann cumarsáid a dhéanamh le comhaltaí eile den fhoireann eitle agus le seirbhísí aerloingseoireachta le linn gach céim den eitilt, lena n-áirítear ullmhú chun eitilte.

1.7. Feistí oiliúna ionsamhalta eitle

Nuair a bhaintear feidhm as feiste oiliúna ionsamhalta eitle (FSTD) chun críocha oiliúna, nó chun a léiriú gur sealbhaíodh nó gur coinníodh ar bun scil phraiticiúil, ní mór an FSTD sin a bheith cáilithe ar leibhéal áirithe feidhmíochta sna réimsí sin atá ábhartha don chúram lena mbaineann. Thar aon rud eile, ní mór macasamhlú sásúil a dhéanamh ar chumraíocht an aerárthaigh, ar a airíonna láimhseála, ar fheidhmiú an aerárthaigh agus ar iompraíocht a chóras.

1.8. Cúrsa oiliúna

- 1.8.1. Ní mór an oiliúint a chur ar fáil trí bhíthin cúrsa oiliúna.

- 1.8.2. Ní mór an cúrsa oiliúna na coinníollacha seo a leanas a chomhlíonadh:

- (a) ní mór siollabas a fhorbairt do gach cineál cúrsa; agus
- (b) cuimseoidh an cúrsa oiliúna sin faisnéis teoriciúil agus treoir phraiticiúil eitle araon (lena n-áirítear oiliúint shintéiseach), más infheidhme.

1.9. Teagascóirí

- 1.9.1. Teagasc teoriciúil

Teagascóirí cuícháilithe amháin a dhéanfaidh an teagasc teoriciúil. Ní mór:

- (a) eolas iomchuí a bheith acu ar an réimse lena mbaineann an teagasc; agus
- (b) iad a bheith in ann modhanna teagaisc iomchuí a úsáid.

- 1.9.2. Teagasc eitle agus teagasc eitle ionsamhalta

Teagascóirí cuícháilithe amháin, a bhfuil na cáilíochtaí seo a leanas acu, a dhéanfaidh an teagasc eitle agus an teagasc eitle ionsamhalta:

- (a) comhlíonfaidh siad na ceanglais iomchuí maidir le heolas teoriciúil agus maidir le taithí de réir an teagaisc atá á thabhairt;
- (b) beidh ar a gcumas teicnící iomchuí teagaisc a úsáid;
- (c) beidh taithí acu ar theicnící teagaisc a bhaineann leis na hainlithe eitle agus na nósanna imeachta eitle ina mbeartófar teagasc a chur ar fáil;

- (d) léireoidh siad go bhfuil cumas teagaisc acu sna réimsí sin ina dtabharfar teagasc eitle, lena n-áirítear teagasc réamh-eitle, teagasc iareitle agus teagasc ar an talamh; agus
- (e) gheobhaidh siad oiliúint athnuachana rialta chun a áirithiú go gcoinneofar na caighdeáin teagaisc cothrom le dáta.

Ina theannta sin, ní mór na teagascóirí eitle a bheith i dteideal feidhmiú mar phíolóta i gceannas ar an aerárthach lena mbaineann an teagasc, ach amháin i gcás oiliúint ar chineálacha nua aerárthaí.

1.10. Scrúdaitheoirí

Maidir leis na daoine a bheidh freagrach as measúnú a dhéanamh ar scil na bpíolótaí, ní mór dóibh:

- (a) na ceanglais i leith teagascóirí eitle nó teagascóirí eitle ionsamhalta a chomhlíonadh; agus
- (b) bheith in ann feidhmíocht píolótaí a mheasúnú chomh maith le tástálacha agus seiceálacha a dhéanamh ar eitle.

2. CEANGLAIS MAIDIR LE TAITHÍ - PÍOLÓTAÍ

Duine a bheidh ag feidhmiú mar chomhalta foirne eitle, mar theagascóir, nó mar scrúdaitheoir, ní mór dó taithí leordhóthanach a shealbhú agus a choinneáil ar bun i dtaca leis na feidhmeanna a chuirfear i gcrích, ach amháin i gcás ina bhforáiltear sna gníomhartha tarmlichte nach mór inniúlacht a léiriú i gcomhréir le pointe 1.5.

3. DEA-SHLÁINTE - PÍOLÓTAÍ

3.1. Critéir leighis

- 3.1.1. Ní mór do na píolótaí go léir a léiriú go tráthrialta go bhfuil siad folláin a ndóthain chun a bhfeidhmeanna a chur i gcrích go sásúil, agus cineál na gníomhaíochta á chur san áireamh. Ní mór a léiriú go bhfuil gach ceanglas á chomhlíonadh trí mheasúnú iomchuí bunaithe ar an gcleachtas aerleighis is fearr, agus cineál na gníomhaíochta á chur san áireamh mar aon leis an díghrádú meabhrach agus coirp a d'fhéadfadh bheith ann de dheasca aoise.

Ciallaíonn dea-shláinte, lena gcuimsítear sláinte choirp agus mheabhrach, nach bhfuil aon ghalar ná aon mhíchumas ag gabháil don píolóta a d'fhágfadh nach mbeadh sé nó sí in ann:

- (a) na cúraimí a dhéanamh is gá chun aerárthach a fheidhmiú;
- (b) na dualgais a shanntar don píolóta a dhéanamh tráth ar bith; nó
- (c) a timpeallacht nó a thimpeallacht a bhrath i gceart.

- 3.1.2. I gcás nach féidir dea-shláinte a léiriú go hiomlán, féadfar bearta maolaithe a chur chun feidhme a chuirfidh sábháilteacht choibhéiseach eitle ar fáil.

3.2. Scrúdaitheoirí aerleighis

Maidir le scrúdaitheoirí aerleighis,

- (a) ní mór dóibh a bheith cáilithe agus ceadúnaithe i gcleachtadh leighis;

- (b) ní mór oiliúint a bheith orthu sa leigheas eitlíochta chomh maith le hoiliúint athnuachana rialta sa leigheas eitlíochta a fháil chun a áirithiú go gcoinneofar ardchaighdeán mheasúnaithe cothrom le dáta; agus
- (c) ní mór eolas praiticiúil agus taithí phraiticiúil a bheith acu ar na dálaí faoina gcuireann píolótaí a gcuid dualgas i gcrích.

3.3. Ionaid Aerleighis

Ní mór ionaid aerleighis na coinníollacha seo a leanas a chomhlíonadh:

- (a) ní mór gach acmhainn a bheith acu is gá le haghaidh raon na bhfreagrachtaí sin a ghabhann lena bpríbhleáidí. Orthu sin beidh na hacmhainní seo a leanas, cé nach iad seo amháin a bheidh ann: áiseanna, pearsanra, trealamh, uirlisí agus ábhar, doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead;
- (b) más iomchuí de réir an chineáil gníomhaíochta a dhéanfar agus mhéid na heagraíochta féin, ní mór córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha sin, go ndéanfar rioscaí sábháilteachta a bhainistiú agus go bhféachfar leis an gcóras sin a fheabhsú go leanúnach. agus
- (c) bunóidh siad socruithe le heagraíochtaí ábhartha eile, más gá, chun a áirithiú go gcloífear leis na ceanglais seo ar bhonn leanúnach.

4. AN FHOIREANN CHÁBÁIN

4.1. Ginearálta

Maidir leis an bhfoireann chábáin:

- (a) ní mór iad a oiliúint go rialta chomh maith le seiceáil a dhéanamh orthu ar bhonn rialta sa chaoi go n-éireoidh leo leibhéal oiriúnach inniúlachta a bhaint amach agus a choinneáil ar bun d'fhonn a gcuid dualgas sábháilteachta a dhéanamh; agus
- (b) ní mór measúnú sláinte a dhéanamh orthu go tréimhsiúil chun a chinntiú go bhfuil siad i gcumas a gcuid dualgas sábháilteachta a dhéanamh go sábháilte. Ní mór a thaispeáint go bhfuil gach ceanglas á chomhlíonadh trí mheasúnú iomchuí a dhéanamh atá bunaithe ar an gcleachtas is fearr ó thaobh aerleighis.

4.2. Cúrsa oiliúna

4.2.1. Más iomchuí de réir chineál na gníomhaíochta nó na bpríbhleáidí atá i gceist, ní mór oiliúint a chur ar fáil trí bhíthin cúrsa oiliúna.

4.2.2. Ní mór an cúrsa oiliúna na coinníollacha seo a leanas a chomhlíonadh:

- (a) ní mór siollabas a fhorbairt do gach cineál cúrsa; agus
- (b) ní mór faisnéis theoiriciúil agus treoir phraiticiúil araon a chuimsiú sa chúrsa oiliúna (lena n-áirítear oiliúint shintéiseach), más infheidhme.

4.3. Teagascóirí na bhFoirne Cábáin

Teagascóirí cuícháilithe amháin a dhéanfaidh an teagasc. Ní mór do na teagascóirí sin:

- (a) eolas iomchuí a bheith acu ar an réimse lena mbaineann an teagasc;

- (b) bheith in ann teicnící iomchuí teagaisc a úsáid; agus
- (c) oiliúint athnuachana a fháil go rialta chun a áirithiú go gcoinneofar na caighdeáin teagaisc cothrom le dáta.

4.4. Scrúdaitheoirí na bhFoirne Cábáin

Ní mór do na daoine sin atá freagrach as an bhfoireann chábáin a scrúdú:

- (a) na ceanglais maidir le teagascóirí na bhfoirne cábáin a chomhlíonadh; agus
- (b) bheith in ann feidhmiú na bhfoirne cábáin a mheasúnú agus scrúduithe a chur ar siúl.

5. EAGRAÍOCHTAÍ OILIÚNA

Ní mór d'eagraíocht oiliúna a sholáthróidh oiliúint do phíolótaí nó d'fhoireann chábáin na ceanglais seo a leanas a chomhlíonadh:

- (a) ní mór gach acmhainn is gá a bheith acu maidir le raon na bhfreagrachtaí sin a bhaineann lena ngníomhaíocht. Orthu sin beidh na hacmhainní seo a leanas, cé nach iad seo amháin a bheidh ann: áiseanna, pearsanra, trealamh, uirlisí agus ábhar, doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead.
- (b) más iomchuí de réir na hoiliúna a chuirfear ar fáil agus mhéid na heagraíochta féin, ní mór don eagraíocht córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha sin, go ndéanfar rioscaí sábháilteachta a bhainistiú agus go bhféachfar leis an gcóras sin a fheabhsú go leanúnach; agus
- (c) bunóidh sí socruithe le heagraíochtaí ábhartha eile, más gá, chun a áirithiú go gcloífear leis na ceanglais thuas ar bhonn leanúnach.

IARSCRÍBHINN V

Ceanglais fhíor-riachtanacha maidir le hoibríochtaí aeir

1. GINEARÁLTA

- 1.1. Níor cheart eitilt a dhéanamh mura mbeidh na comhaltaí foirne ar fad agus, más iomchuí, pearsanra oibríochta eile nach comhaltaí iad ach atá bainteach le hullmhú na heitilte agus lena cur i bhfeidhm, eolach ar na dlíthe, ar na rialacháin agus ar na nósanna imeachta is infheidhme maidir le comhlíonadh a ndualgas agus atá forordaithe do na limistéir atá le trasnú, do na haeradróim a bhfuil sé i gceist feidhm a bhaint astu agus do na háiseanna aerloingseoireachta a bhaineann leo.
- 1.2. Ní mór eitilt a dhéanamh ar bhealach a dheimhníonn go mbeifear ag cloí leis na nósanna imeachta oibriúcháin a shonraítear sa Lámhleabhar Eitilte nó, más gá, sa Lámhleabhar Oibríochta, maidir le hullmhú agus cur i gcrích na heitilte. Chun é seo a éascú, ní mór córas seicliosta a bheith ar fáil, más infheidhme, chun go n-úsáidfídh an fhoireann é ag gach céim d'oibriú an aerárthaigh i ndálaí agus i suímh choitianta, i ndálaí agus i suímh neamhghnácha agus i ndálaí agus i suímh éigeandála. Ní mór nósanna imeachta a bhunú maidir le haon suíomh éigeandála a mbeadh coinne réasúnta leis.
- 1.3. Roimh gach eitilt, caithfidh róil agus dualgais gach comhalta foirne a bheith sainithe. Ní mór don phíolóta i gceannas a bheith freagrach as oibriú agus sábháilteacht an aerárthaigh agus as sábháilteacht na gcomhaltaí foirne, na bpaisinéirí agus an lasta ar fad atá ar bord.
- 1.4. Aon earraí nó aon substaintí a d'fhéadfadh bheith ina mbagairt shuntasach sláinte, sábháilteachta, maoine nó ina mbagairt ar an gcomhshaol, amhail earraí contúirteacha, airm agus armlón, níor cheart iad a thabhairt ar bord aon aerárthaigh mura gcuirfear nósanna imeachta sonracha a bhaineann le sábháilteacht i bhfeidhm d'fhonn na rioscaí gaolmhara a mhaolú.
- 1.5. Na sonraí, na doiciméid, na taifid agus an fhaisnéis uile is gá chun urramú na gcoinníollacha a shonraítear i bpointe 5.3 a thaifead, ní mór iad a choinneáil i gcás gach eitilte agus fáil a bheith orthu ar feadh íostréimhse ama atá comhoiriúnach don chineál oibríochta atá i gceist.

2. ULLMHÚ EITILTE

Níor cheart eitilt a thosú murar cinntíodh ar gach bealach réasúnta dá bhfuil le fáil go bhfuiltear ag cloí leis na coinníollacha seo a leanas ar fad:

- (a) Áiseanna leordhóthanacha a bheidh ag teastáil go díreach don eitilt agus d'oibriú sábháilte an aerárthaigh, lena n-áirítear áiseanna cumarsáide agus loingseoireachta, a bheith ar fáil chun an eitilt a chur i gcrích, agus doiciméadacht sin na Seirbhísí Faisnéise Aerloingseoireachta a bhfuil teacht uirthi á cur san áireamh.
- (b) Ní mór an fhoireann agus na paisinéirí a bheith ar an eolas faoi shuíomh agus faoi úsáid an trealaimh éigeandála a bhaineann le hábhar. Ní mór a ndóthain faisnéise faoi nósanna imeachta éigeandála agus faoi úsáid trealaimh sábháilteachta cábáin a chur ar fáil don fhoireann agus do phaisinéirí, ar faisnéis í a bhaineann le hoibriú an aerárthaigh atá i gceist agus go sonrach leis an trealamh suiteáilte.

- (c) Ní mór don phíolóta i gceannas a bheith deimhin de:
- (i) go bhfuil an t-aerárthach aeracmhainneach de réir mar a shonraítear i bpointe 6;
 - (ii) má cheanglaítear sin, go bhfuil an t-aerárthach cláraithe go hiomchuí agus go bhfuil deimhnithe iomchuí i ndáil leis an méid sin ar bord an aerárthaigh;
 - (iii) go bhfuil uirlisí agus trealamh de réir mar a shonraítear iad i bpointe 5, agus ar gá iad chun an eitilt sin a chur i gcrích, suiteáilte san aerárthach agus go bhfeidhmíonn siad, mura ndearnadh iad a tharscaoileadh faoin Íoslíosta Trealamh (MEL) is infheidhme nó faoi dhoiciméad coibhéiseach;
 - (iv) go bhfuil mais an aerárthaigh agus an áit ina bhfuil an meáchanlár i gcóir chun gur féidir an eitilt a sheoladh laistigh de theorainneacha a fhorordaítear sa doiciméadacht aeracmhainneachta;
 - (v) go bhfuil an bagáiste cábáin, an bagáiste boilg chomh maith leis an lasta luchtaithe agus socraithe i gceart; agus
 - (vi) nach sárófar na srianta maidir le hoibriú aerárthaí a shonraítear i bpointe 4 ag aon am le linn na heitilte.
- (d) Ní mór faisnéis faoi dhálaí meitéareolaíochta don aeradróm imeachta, don aeradróm cinn scríbe agus, más infheidhme, d'aeradróm mhalartacha, chomh maith le faisnéis faoi dhálaí faoi bhealach, a bheith ar fáil d'fhoireann na heitilte. Ní mór aird ar leith a thabhairt ar dhálaí atmaisféir a d'fhéadfadh bheith guaiseach.
- (e) I gcás eitilt isteach i ndálaí arb eol iad a bheith oighrithe nó a mheastar a bheidh oighrithe, ní mór an t-aerárthach a bheith deimhnithe, feistithe agus/nó cóireáilte chun feidhmiú go sábháilte sna dálaí sin.
- (f) Le haghaidh eitilt atá bunaithe ar rialacha amharc-eitilte, ní mór dálaí meitéareolaíochta ar feadh an aerbhealaigh ar a mbeifear a bheith i gcóir chun gur féidir cloí leis na rialacha eitilte sin. Le haghaidh eitilt bunaithe ar rialacha uirlisí eitilte ní mór ceann scríbe a roghnú agus, más gá, ní mór aeradróm malartach nó aeradróm mhalartacha a roghnú inar féidir leis an aerárthach tuirlingt, agus na dálaí meitéareolaíochta atá tuartha á gcur san áireamh go sonrach chomh maith le hinfhaighteacht seirbhísí aerloingseoireachta, infhaighteacht áiseanna talún agus na nósanna imeachta eitilte uirlise arna bhformheas ag an Stát ina bhfuil an ceann scríbe agus/nó an t-aeradróm malartach sin suite.
- (g) Ní mór breosla/fuinnimh leordhóthanach le haghaidh tiomána a bheith ar bord, chomh maith le tomhaltán leordhóthanach, chun a áirithiú gur féidir an eitilt atá i gceist a thabhairt chun críche go sábháilte, agus dálaí meitéareolaíochta á gcur san áireamh chomh maith le haon ní eile a théann i bhfeidhm ar fheidhmiú an aerárthaigh agus aon mhoill lena bhfuil coinne le linn eitilte. Lena chois sin, ní mór cúltaisce breosla/fuinnimh a bheith ar bord chun bheith ullmhaithe in aghaidh teagmhas. Ní mór nósanna imeachta a bhunú maidir le bainistíocht breosla/fuinnimh le linn eitilte nuair a bhaineann sin le hábhar.

3. OIBRÍOCHTAÍ EITILTE

Maidir le hoibríochtaí eitilte, ní mór na coinníollacha uile seo a leanas a chomhlíonadh:

- (a) más iomchuí de réir an chineáil aerárthaigh atá i gceist, le linn éirí de thalamh agus tuirlingthe, agus aon uair a mheasann an píolóta i gceannas gur gá sin ar mhaithe le sábháilteacht, ní mór do gach comhalta foirne bheith ina shuí ag a stáisiún foirne agus na córais srianta a chuirtear ar fáil a úsáid;
- (b) más iomchuí de réir an chineáil aerárthaigh atá i gceist, ní mór do chomhaltaí foirne eitilte a n-iarrtar orthu bheith ar dualgas ar an deic eitilte, bheith ag a stáisiún, agus fanacht ag a stáisiún, agus a gcrios sábhála fáiscithe orthu ach amháin fad a bheidh siad faoi bhealach ar mhaithe le riachtanais fiseolaíochta nó oibríochtúla.
- (c) más iomchuí de réir an chineáil aerárthaigh atá i gceist agus an chineáil oibríochta, roimh éirí de thalamh agus roimh thuirlingt, le linn a inneallta agus nuair a mheastar go bhfuil sé riachtanach ar mhaithe le sábháilteacht, ní mór don pháilóta i gceannas a áirithiú go bhfuil gach paisinéir suite go hiomchuí agus go bhfuil an crios sábhála ceangailte go slán;
- (d) ní mór eitilt a dhéanamh i dtreo is go mbeidh spás iomchuí fágtha idir an t-aerárthach agus aerárthaí eile agus gur leor an réiteach constaicí a dhéanfar, ag gach céim den eitilt. Ar a laghad, ní mór an spás sin a bheith de réir na spásanna a cheanglaítear leis na rialacha aeir is infheidhme, más iomchuí don chineál oibríochta atá i gceist;
- (e) Níor cheart leanúint d'eitilt mura leanfaidh na dálaí aitheanta de bheith i gcoibhéis leo siúd i bpointe 2, ar a laghad. Ina theannta sin, le haghaidh eitilt atá bunaithe ar rialacha uirlisí eitilte, níor cheart leanúint d'ascnamh i dtreo aerodróim faoi bhun airde shonraithe nó thar shuíomh áirithe mura gcomhlíonfar critéir fhorordaithe léargais;
- (f) i gcás éigeandála, ní mór don pháilóta i gceannas a áirithiú go dtugtar treoir don uile phaisinéir faoin ngníomh éigeandála ab iomchuí de réir na gcúinsí sin;
- (g) ní mór don pháilóta i gceannas gach beart is gá a dhéanamh chun na hiarmhairtí a bheadh ag iompraíocht shuaiteach paisinéirí ar an eitilt a laghdú;
- (h) níor cheart aerárthach a inleadh ar an talamh i limistéar gluaiseachta aeradróim, ná a rótar a chasadh faoi chumhacht, mura bhfuil an duine atá ag na rialtáin inniúil mar is iomchuí;
- (i) ní mór na nósanna imeachta is infheidhme maidir le bainistíocht breosla/fuinnimh le linn na heitilte a leanúint, nuair is ábhartha.

4. FEIDHMIÚ AERÁRTHAÍ AGUS SRIANTA OIBRÍOCHTA

- 4.1. Ní mór aerárthach a oibriú i gcomhréir lena dhoiciméadacht aeracmhainneachta agus i gcomhréir leis na nósanna imeachta oibríochta agus leis na teorainneacha gaolmhara uile faoi mar a chuirtear in iúl iad ina lámhleabhar eitilte formheasta nó i ndoiciméadacht choibhéiseach, de réir mar a bheidh. Ní mór teacht a bheith ag an bhfoireann ar an lámhleabhar eitilte nó ar dhoiciméadacht choibhéiseach agus ní mór iad a choinneáil cothrom le dáta le haghaidh gach aerárthaigh.
- 4.2. Gan dochar do phointe 4.1, maidir le hoibríochtaí ar héileacaptair, féadfar eitilt mheandair tríd an imchlúdach teorantach treoluais agus airde a cheadú ar choinníoll go n-áirithítear leibhéal leordhóthanach sábháilteachta.
- 4.3. Ní mór an t-aerárthach a oibriú i gcomhréir leis an doiciméadacht chomhshaoil is infheidhme.
- 4.4. Níor cheart tús a chur le heitilt nó leanúint di mura bhfágfaidh feidhmiú sceidealta an aerárthaigh, agus na fachtóirí uile a théann i bhfeidhm go mór ar a leibhéal feidhmiúlachta á gcur san áireamh, gur féidir gach céim den eitilt a dhéanamh laistigh de na hachair/na réimsí agus de na réitigh maidir le constaicí is infheidhme ag an mais oibríochta phleanáilte. Seo a leanas fachtóirí feidhmiúlachta ar leith a théann go mór i bhfeidhm ar éirí de thalamh agus ar thuirlingt go sonrach:
 - (a) nósanna imeachta oibríochta;
 - (b) airde brú an aeradróim;
 - (c) teocht;
 - (d) gaoth;
 - (e) méid, fána agus staid an limistéir éirí de thalamh/tuirlingthe; agus
 - (f) staid an aerfhráma, an ghléasra cumhachta nó na gcóras, á chur san áireamh go bhféadfadh meath bheith i gceist.

- 4.5. Ní mór na fachtóirí sin a chur san áireamh go díreach mar pharaiméadair oibríochta nó go hindíreach trí chorrlaigh nó liúntais, a d'fhéadfaí a sholáthar i sceidealú na sonraí feidhmiúlachta, más iomchuí de réir an chineáil oibríochta atá i gceist.

5. UIRLISÍ, SONRAÍ AGUS TREALAMH

- 5.1. Ní mór gach trealamh aerloingseoireachta agus cumarsáide agus gach trealamh eile is gá le haghaidh na heitilte atá beartaithe a chur ar aerárthach, agus na rialacháin aerthrachta agus na rialacha aeir is infheidhme ag aon chéim den eitilt á gcur san áireamh.
- 5.2. Nuair is iomchuí, ní mór gach trealamh sábháilteachta, leighis, aslonnaithe agus marthanais is gá a chur ar aerárthach, agus na rioscaí a bhaineann leis na réimsí oibríochta, leis na bealaí a eitleofar, le hairde na heitilte chomh maith lena fad á gcur san áireamh.
- 5.3. Na sonraí uile is gá chun go gcuirfidh an fhoireann an eitilt i gcrích, ní mór iad a thabhairt cothrom le dáta agus fáil a bheith orthu ar bord an aerárthaigh, agus rialacháin aerthrachta, rialacha an aeir, airde eitiltí chomh maith leis na réimsí oibríochta is infheidhme á gcur san áireamh.

6. AERACMHAINNEAGHT AR BHONN LEANÚNACH AGUS COMHOIRIÚNAGHT CHOMHSHAOIL TÁIRGÍ

- 6.1. Níor cheart an t-aerárthach a oibriú:
- (a) mura mbeidh an t-aerárthach i staid aeracmhainneach agus mura gcomhlíonfaidh sé na ceanglais is infheidhme maidir le comhoiriúnacht chomhshaoil táirgí;
 - (b) mura mbeidh an trealamh oibríochta agus éigeandála is gá le haghaidh na heitilte atá i gceist inseirbhíse;
 - (c) mura mbeidh doiciméad aeracmhainneachta an aerárthaigh bailí agus, más infheidhme, mura mbeidh a dheimhniú torainn bailí; agus
 - (d) mura ndéanfar cothabháil an aerárthaigh ar bhealach atá i gcomhréir leis na ceanglais is infheidhme.
- 6.2. Roimh gach eitilt nó sraith eitiltí comhleanúnacha, ní mór an t-aerárthach a iniúchadh, trí sheiceáil réamh-eitilte, chun a chinneadh an bhfuil sé oiriúnach don eitilt atá beartaithe.
- 6.3. Níor cheart an t-aerárthach a oibriú mura scaoilfear amach é le haghaidh seirbhíse ag daoine nó eagraíochtaí cáilithe, i ndiaidh a chothabhála. Go sonrach, ní mór sonraí bunúsacha na cothabhála a rinneadh a bheith ar an scaoileadh sínithe le haghaidh seirbhíse.
- 6.4. Na taifid sin is gá chun aeracmhainneacht an aerárthaigh agus a stádas comhoiriúnachta chomhshaoil a léiriú, ní mór iad a choinneáil ar feadh na tréimhse sin atá leagtha síos sna ceanglais aeracmhainneachta leanúnaí is infheidhme, go dtí go dtiocfaidh faisnéis nua in ionad na faisnéise atá iontu, atá coibhéiseach i raon agus i sonraí agus, ar chaoi ar bith, nach lú an tréimhse a choinnítear iad ná 24 mhí.
- 6.5. Ní mór gach modhnú agus gach cóiriú dá ndéanfar na ceanglais fhíor-riachtanacha maidir le haeracmhainneacht agus, más infheidhme, maidir le comhoiriúnacht chomhshaoil táirgí, a chomhlíonadh. Ní mór na sonraí sin a léiríonn gur comhlíonadh

na ceanglais fhíor-riachtanacha maidir le haeracmhainneacht agus, más infheidhme, maidir le comhoiriúnacht chomhshaoil táirgí, a choinneáil.

- 6.6. I gcás ina mbeidh tríú páirtí i mbun na cothabhála, is faoin oibreoir a áirithiú go gcomhlíonfaidh an tríú páirtí sin ceanglais sábháilteachta agus slándála an oibreora.

7. COMHALTAÍ FOIRNE

- 7.1. Ní mór líon agus comhdhéanamh na foirne a chinneadh, agus na nithe seo a leanas á gcur san áireamh:

- (a) teorainneacha deimhniúcháin an aerárthaigh, lena n-áirítear, más infheidhme, an léiriú aslonnaithe éigeandála a bhaineann le hábhar;
- (b) cumraíocht an aerárthaigh; agus
- (c) cineál agus fad na n-oibríochtaí.

- 7.2. Ní mór é a bheith d'údarás ag an bpiólóta i gceannas an uile ordú a thabhairt agus aon bhearta iomchuí a dhéanamh ar mhaithe le hoibríocht agus sábháilteacht an aerárthaigh agus ar mhaithe le hoibríocht agus sábháilteacht na ndaoine agus/nó na maoine atá á n-iompar nó á hiompar ann a áirithiú.

- 7.3. I gcás éigeandála a chuireann oibríocht nó sábháilteacht an aerárthaigh agus/nó daoine ar bord i mbaol, ní mór don phiólóta i gceannas aon bheart is gá dar leis/léi a dhéanamh ar mhaithe le sábháilteacht. Nuair a ghabhann sárú rialachán nó nósanna imeachta áitiúla leis na bearta sin, ní mór don phiólóta i gceannas a bheith freagrach as an údarás áitiúil iomchuí a chur ar an eolas mar gheall air sin gan mhoill.

- 7.4. Níor cheart suímh éigeandála nó suímh neamhghnácha a ionsamhlú nuair atá paisinéirí á n-iompar nó lasta á iompar.

- 7.5. Níor cheart d'aon chomhalta foirne ligean do chur i gcrích a chúraimí/dá chinnteoireacht meathlú sa chaoi go gcuirtear sábháilteacht eitilte i mbaol de bharr tuirse, agus carnadh tuirse, easpa codlata, líon na n-earnálacha ar eitlódh iontu, dualgais san oíche nó athruithe amchreasa, *inter alia*, á gcur san áireamh. I dtaca le tréimhsí scíthe, ní mór go leor ama a bheith i gceist leo chun a chur ar chumas comhaltaí foirne éifeachtaí na ndualgas roimhe sin a chur díobh agus bheith tagtha chucu féin faoi thús na chéad tréimhse dualgais eitilte eile.

- 7.6. Níor cheart do chomhalta foirne na dualgais sin a leithdháiltear air nó uirthi a fheidhmiú ar bord aerárthaigh agus é nó í faoi thionchar substaintí sícighníomhacha nó alcóil nó nuair nach bhfuil sé nó sí ina shláinte nó ina sláinte de dheasca gortú, tuirse, cógais, tinnis nó cúiseanna eile den sórt sin.

8. CEANGLAIS EILE MAIDIR LE HAERIOMPAR TRÁCHTÁLA AGUS LE HOIBRÍOCHTAÍ NACH É ATÁ FAOI RÉIR CEANGLAS DEIMHNIÚCHÁIN NÓ CEANGLAS DEARBHAITHE

- 8.1. Níor cheart oibríochtaí aerárthaí chun críocha aeriompar tráchtála ná oibríochtaí aerárthaí nach iad atá faoi réir ceanglas deimhniúcháin nó ceanglas dearbhaithe a dhéanamh mura gcomhlíonfar na coinníollacha seo a leanas:

- (a) ní mór an acmhainn is gá le haghaidh scála agus raon na n-oibríochtaí a bheith ag oibreoir, cibé acu go díreach é nó de thoradh comhaontuithe le tríú páirtithe. Orthu sin beidh na hacmhainní seo a leanas cé nach iad seo amháin a bheidh ann: aerárthaí, áiseanna, struchtúr bainistíochta, pearsanra, trealamh,

doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead;

- (b) ní mór don oibreoir pearsanra cuícháilithe agus cuí-oilte agus iad sin amháin a úsáid, chomh maith le cláir oiliúna agus seiceála a chur i bhfeidhm agus a choinneáil ar bun le haghaidh chomhaltaí na foirne agus aon phearsanra ábhartha;
- (c) ní mór don oibreoir Íoslíosta Trealaimh (MEL) nó a choibhéis de dhoiciméad a bhunú, agus na nithe seo a leanas á gcur san áireamh:
 - (i) ní mór an doiciméad soláthar a dhéanamh maidir le hoibriú an aerárthaigh, i ndálaí sonraithe, le huirli sí áirithe, míreanna trealamh nó feidhmeanna áirithe atá as feidhm tráth a chuirtear tús leis an eilt;
 - (ii) ní mór an doiciméad a ullmhú do gach aerárthach ar leith, agus coinníollacha oibríochta agus cothabhála an oibreora a bhaineann le hábhar á gcur san áireamh; agus
 - (iii) ní mór an MEL a bheith bunaithe ar an Íoslíosta Trealaimh Mór (MMEL), má tá fáil air, agus níor cheart níos lú srianta a bheith ann ná mar atá i MMEL;
- (d) más iomchuí de réir an chineáil gníomhaíochta a dhéanfar agus mhéid na heagraíochta féin, ní mór don oibreoir córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha seo, go ndéanfar rioscaí sábháilteachta a bhainistiú agus go bhféachfar leis an gcóras seo a fheabhsú go leanúnach.
- (e) déanfaidh an eagraíocht córas tuairiscithe tarluithe a bhunú mar chuid den chóras bainistíochta faoi phointe (d) d'fhonn cur leis an gcuispóir maidir le sábháilteacht a fheabhsú go leanúnach. Beidh an córas tuairiscithe tarluithe i gcomhréir le Rialachán (AE) 376/2014.

8.2. Is ceart an oibríocht a dhéanamh de réir lámhleabhar oibríochta an oibreora agus dá réir sin amháin. Cuimseofar sa lámhleabhar sin na teoracha, an fhaisnéis agus na nósanna imeachta uile is gá le haghaidh gach aerárthaigh dá n-oibrítear agus chun gur féidir leis an bpearsanra oibriúcháin a gcuid dualgas a chomhlíonadh. Ní mór na teorainneacha is infheidhme maidir le hamanna eitilte, tréimhsí dualgais eitilte agus tréimhsí scíthe don fhoireann a shonrú. Ní mór an lámhleabhar oibríochta agus aon leasuithe a dhéanfar air a bheith de réir an lámhleabhair eitilte fhormheasta agus ní mór é a leasú más gá.

8.3. Déanfaidh an t-oibreoir nósanna imeachta a bhunú, más iomchuí, chun na hiarmhairtí a bheadh ag iompraíocht shuaiteach paisinéirí ar oibríochtaí eitilte sábháilte a laghdú.

8.4. Ní mór don oibreoir cláir shlándála a fhorbairt agus a choinneáil ar bun atá curtha in oiriúint don aerárthach agus don chineál oibríochta lena n-áirítear go háirithe:

- (a) slándáil urrann na foirne eitilte;
- (b) seicliosta nósanna imeachta maidir le cuardach aerárthaí;
- (c) cláir oiliúna; agus
- (d) córais leictreonacha agus córais ríomhairí a chosaint sa chaoi go gcoiscfear aon chur isteach nó éilliú a dhéanfaí orthu, cibé acu d'aon ghnó nó de neamhthoil é sin.

- 8.5. Nuair a d'fhéadfadh bearta slándála tionchar diúltach a imirt ar shábháilteacht oibríochtaí, ní mór na rioscaí a mheasúnú agus nósanna imeachta iomchuí a fhorbairt chun rioscaí sábháilteachta a mhaolú; d'fhéadfadh sé go mbeadh gá le saintrealamh chun é sin a dhéanamh.
- 8.6. Ní mór don oibreoir aon phíolóta amháin as foireann na heitilte a ainmniú mar phíolóta i gceannas.
- 8.7. Ní mór bainistiú a dhéanamh ar chosc tuirse trí bhíthin córas bainistíochta tuirse. Le haghaidh eitilte, nó sraith eitiltí, ní mór am eitilte, tréimhsí dualgais agus tréimhsí scíthe oiriúnaithe a chur san áireamh sa chóras réamhráite. Ní mór na teorainneacha a bhunaítear laistigh den chóras bainistíochta tuirse na fachtóirí ábhartha uile a chuireann le tuirse a chur san áireamh amhail, go háirithe, líon na gcriosanna trínar eitlódh, trasnú amchriosanna, easpa codlata, cur isteach ar rithim laethúil na colainne, uaireanta oíche, suiteáil, am dualgais carnach ar feadh tréimhsí áirithe, cúraimí leithdháilte a roinntear ar chomhaltaí foirne chomh maith le soláthar foirne méadaithe.
- 8.8. Ní mór don oibreoir a áirithiú go bhfuil na cúraimí a shonraítear i bpointe 6.1 agus na cúraimí a thuairiscítear i bpointí 6.4 agus 6.5 á rialú ag eagraíocht atá freagrach as bainistíocht aeracmhainneachta leanúnaí, eagraíocht nach mór di na ceanglais atá in Iarscríbhinn II, pointe 3.1 agus in Iarscríbhinn III, pointí 7 agus 8 a chomhlíonadh.
- 8.9. Ní mór don oibreoir a áirithiú go n-eiseoidh eagraíocht atá cáilithe i gcothabháil táirgí, páirteanna agus trealaimh neamhshuiteáilte an scaoileadh chun seirbhíse a cheanglaítear le pointe 6.3. Ní mór don eagraíocht sin na ceanglais atá in Iarscríbhinn II, pointe 3.1 a chomhlíonadh.
- 8.10. Bunóidh an eagraíocht dá dtagraítear i bpointe 8.8 lámhleabhar eagraíochta, chun go n-úsáidfídh an pearsanra lena mbaineann é agus chun go dtreoróidh sé iad, lámhleabhar ina dtuairiscítear nósanna imeachta uile na heagraíochta maidir le haeracmhainneacht leanúnach.

IARSCRÍBHINN VI

Ceanglais fhíor-riachtanacha maidir le haonáin cháilithe

1. An t-aonán cáilithe ('aonán'), a Stiúrthóir nó an fhoireann atá freagrach as na cúraimí deimhniúcháin agus maoirseachta a dhéanamh, ní fhéadfaidh siad baint a bheith acu, cibé acu go díreach é nó mar ionadaithe údaraithe, le dearadh, le monarú, le margaiócht ná le cothabháil na dtáirgí, na bpáirteanna, an trealamh neamhsuáilte, na gcomhdhamhnaí ná na gcóras ná ina gcuid oibríochtaí, ina soláthar seirbhíse ná ina n-úsáid. Ní fhágann sin nach bhféadfaí faisnéis theicniúil a mhalartú idir na heagraíochtaí atá i gceist agus an t-aonán cáilithe.

Maidir le heagraíochtaí a bunaíodh d'fhonn eitlíocht spóirt nó fóillíochta a chur chun cinn, ní chuirfidh an mhír thuas cosc ar iad a bheith incháilithe le haghaidh creidiúnú mar aonán cáilithe, ar choinníoll go léireoidh siad chun sástacht an údarais chreidiúnaithe go bhfuil socruithe leordhóthanacha curtha i bhfeidhm acu maidir le coinbhleacht leasa a sheachaint.
2. Ní mór don aonán agus don fhoireann atá freagrach as na cúraimí deimhniúcháin agus maoirseachta a gcuid dualgas a dhéanamh leis an oiread ionracais ghairmiúil agus is féidir agus leis an inniúlacht theicniúil is fearr agus ní mór dóibh a bheith saor ó aon bhrú nó aon dreasacht, go háirithe más de chineál airgeadais é, a d'fhéadfadh tionchar a imirt ar a mbreithiúnas nó ar thorthaí a gcuid cúraimí deimhniúcháin agus maoirseachta, go sonrach más ó dhaoine nó ó ghrúpaí daoine a ndéanann torthaí na gcúraimí sin difear dóibh, a thagann an brú nó an dreasacht sin.
3. Ní mór don aonán foireann a fhostú agus an acmhainn a bheith aige chun na cúraimí teicniúla agus riaracháin a bhaineann leis an bpróiseas deimhniúcháin agus maoirseachta a dhéanamh go leordhóthanach; beidh teacht aige freisin ar an trealamh is gá chun seiceálacha eisceachtúla a dhéanamh.
4. An t-aonán agus an fhoireann atá freagrach as imscrúduithe a dhéanamh, beidh acu:
 - (a) oiliúint theicniúil agus ghairmiúil den scoth nó saineolas leordhóthanach a fuarthas de thoradh gníomhaíochtaí iomchuí a dhéanamh,
 - (b) eolas sásúil ar cheanglais na gcúraimí deimhniúcháin agus maoirseachta a dhéanann siad agus taithí leordhóthanach ar na próisis sin;
 - (c) an cumas is gá chun ráitis, taifid agus tuarascálacha a ullmhú ionas go léireofar gur cuireadh na cúraimí deimhniúcháin agus maoirseachta i gcrích.
5. Ní mór neamhchlaontacht na foirne sin atá freagrach as na cúraimí deimhniúcháin agus maoirseachta a ráthú. Ní ceadmhach go mbraithfeadh a luach saothair ar an méid imscrúduithe a dhéantar ná ar thorthaí na n-imscrúduithe sin.
6. Ní mór don aonán árachas dliteanais a thógáil amach ach amháin i gcás ina ngabhann Ballstát amháin dliteanas an aonáin air féin i gcomhréir lena dhlí náisiúnta.
7. Ní mór do bhaill foirne an aonáin rúndacht ghairmiúil a urramú maidir leis an bhfaisnéis uile a fhaightear le linn dóibh a gcuid cúraimí a dhéanamh faoin Rialachán seo.

IARSCRÍBHINN VII

Ceanglais fhíor-riachtanacha maidir le haeradróim

1. SAINTRÉITHE FISICEACHA, BONNEAGAR AGUS TREALAMH

1.1. Limistéar gluaiseachta

1.1.1. Beidh limistéar ainmnithe i ngach aeradróm ina bhféadfaidh aerárthaí tuirlingt agus éirí de thalamh, limistéar lena gcomhlíonfar na coinníollacha seo a leanas:

- (a) Na toisí agus na tréithe sin a ghabhfaidh leis an limistéar seo, beidh siad oiriúnach do na haerárthaí a bhfuil sé beartaithe go n-úsáidfí siad an áis sin;
- (b) beidh neart iompair sa limistéar seo, más infheidhme, ar leor é chun oibríochtaí atriallacha na n-aerárthaí atá beartaithe a iompar. Maidir leis na limistéir sin nach bhfuil oibríochtaí atriallacha beartaithe dóibh, is leor go mbeadh sé d'acmhainn iontu an t-aerárthach féin a iompar;
- (c) beidh an limistéar tuirlingthe agus éirí de thalamh deartha sa chaoi go ndéanfar uisce a thaoscadh agus nach mbeidh uisce bodhar ina riosca do-ghlactha d'oibríochtaí na n-aerárthaí;
- (d) ní chruthóidh an fhána ná athruithe ar fhána sa limistéar sin riosca do-ghlactha d'oibríochtaí na n-aerárthaí;
- (e) beidh saintréithe dromchla an limistéir tuirlingthe agus éirí de thalamh oiriúnach d'úsáid na n-aerárthaí atá beartaithe; agus
- (f) beidh an limistéar sin saor ó ábhair a d'fhéadfadh riosca do-ghlactha a chruthú d'oibríochtaí aerárthaí.

1.1.2. I gcás ina mbeidh níos mó ná limistéar ainmnithe amháin tuirlingthe agus éirí de thalamh ann, beidh siad leagtha amach sa chaoi nach gcruthófar riosca do-ghlactha d'oibríochtaí na n-aerárthaí dá ndeasca.

1.1.3. Beidh an limistéar ainmnithe tuirlingthe agus éirí de thalamh timpeallaithe ag limistéir shainithe. Tá na limistéir sin ceaptha aerárthaí a bheidh ag eitilt os a gcionn a chosaint le linn oibríochtaí éirí de thalamh nó oibríochtaí tuirlingthe nó chun na hiarmhairtí a mhaolú i gcás gearrthuirlingthe, nó i gcás imeacht ó thaobh nó imeacht ó dheireadh an limistéir éirí de thalamh agus tuirlingthe, agus comhlíonfaidh na limistéir sin na coinníollacha seo a leanas:

- (a) beidh toisí na limistéar seo oiriúnach do na hoibríochtaí aerárthaí réamh-mheasta;
- (b) ní chruthóidh an fhána ná athruithe ar fhána sna limistéir sin riosca do-ghlactha d'oibríochtaí na n-aerárthaí.
- (c) coinneofar na limistéir sin saor ó ábhair a d'fhéadfadh riosca do-ghlactha a chruthú d'oibríochtaí na n-aerárthaí. Ní chuirfear cosc mar gheall air sin ar threalamh inbhriste a shuí sna limistéir sin, i gcás ina mbeadh gá leis chun cuidiú le hoibríochtaí na n-aerárthaí; agus
- (d) maidir le gach ceann de na limistéir sin, beidh neart iompair ann ar leor é chun fónamh dá chuspóir.

1.1.4. Na limistéir sin in aeradróm, mar aon lena ngarthimpeallachtaí, a bheidh in úsáid agus aerárthaí á n-inleadh nó á bpáirceáil, déanfar iad a dhearadh ionas go bhféadfar

na haerárthaí, a bhfuiltear ag súil ina leith go n-úsáidfídh siad an áis áirithe lena mbaineann, a oibriú go sábháilte faoi na dálaí go léir a bhfuil pleanáil déanta ina leith agus comhlíonfaidh siad na coinníollacha seo a leanas:

- (a) beidh neart iompair sna limistéir sin ar leor é chun oibríochtaí atriallacha na n-aerárthaí atá beartaithe a iompar, cé is moite de limistéir a meastar ina leith nach n-úsáidfear iad ach go hócáideach agus gur leor go mbeidh sé d'acmhainn iontu an t-aerárthach féin a iompar;
- (b) beidh na limistéir sin deartha sa chaoi go ndéanfar uisce a thaoscadh agus nach mbeidh uisce bodhar ina riosca do-ghlactha d'oibríochtaí na n-aerárthaí;
- (c) ní chruthóidh an fhána ná athruithe ar fhána sna limistéir seo riosca do-ghlactha d'oibríochtaí na n-aerárthaí;
- (d) beidh saintréithe dromchla na limistéir sin oiriúnach d'úsáid na n-aerárthaí atá beartaithe; agus
- (e) déanfar na limistéir sin a choinneáil saor ó ábhair a d'fhéadfadh riosca do-ghlactha a chruthú do na haerárthaí. Ní chuirfear cosc mar gheall air sin ar threalamh páirceála, a mbeadh gá leis don limistéir sin, a shuí i suíomhanna sainaitheanta nó i gcriosanna sainaitheanta.

- 1.1.5. Déanfar bonneagar eile atá beartaithe d'úsáid na n-aerárthaí a dheardh sa chaoi nach gcruthóidh úsáid an bhonneagair sin riosca do-ghlactha do na haerárthaí a bheidh ag baint úsáid as.
- 1.1.6. Beidh déanmhais, foirgnimh, limistéir threalaimh nó réimsí stórála suite agus deartha sa chaoi nach gcruthófar riosca do-ghlactha d'oibríochtaí na n-aerárthaí dá ndeasca.
- 1.1.7. Déanfar meáin oiriúnacha a sholáthar ionas nach bhféadfaidh daoine neamhúdaraith, feithiclí neamhúdaraith ná ainmhithe atá mór a ndóthain chun riosca do-ghlactha a chruthú d'oibríochtaí aerárthaí dul isteach sa limistéar gluaiseachta, ach sin gan dochar d'fhorálacha náisiúnta agus idirnáisiúnta a bhaineann le cosaint ainmhithe.

1.2. Glanspásanna ó chonstaicí

- 1.2.1. Déanfar bealaí nó limistéir isteach agus amach a bhunú chun aerárthaí atá ar tí tuirlingt in aeradróm, nó ar tí imeacht as aeradróm a chosaint. Déanfaidh na bealaí nó na limistéir sin an glanspás riachtanach ó chonstaicí atá suite sa cheantar timpeall ar an aeradróm a sholáthar agus lánaird á tabhairt ar na saintréithe fisiceacha áitiúla.
- 1.2.2. Beidh na glanspásanna ó chonstaicí sin oiriúnach don chéim den eitilt agus don chineál oibríochta atá á cur i gcrích. Déanfar an trealamh atá á úsáid chun suíomh an aerárthaigh a dhéanamh amach a chur san áireamh freisin.

1.3. Áiseanna amhairc agus neamhamhairc agus trealamh aeradróim

- 1.3.1. Beidh na háiseanna oiriúnach don chuspóir atá beartaithe dóibh, beidh siad inaitheanta agus déanfaidh siad faisnéis gan athbhrí a sholáthar d'úsáideoirí faoi na dálaí oibríochtúla go léir atá beartaithe.
- 1.3.2. Feidhmeoidh an trealamh aeradróim mar a bheidh beartaithe faoi na dálaí oibríochtúla réamh-mheasta. Ní dhéanfaidh trealamh aeradróim riosca do-ghlactha a chruthú do shábháilteacht eitlíochta faoi dhálaí oibríochtúla ná i gcás ina dtarlaíonn cliseadh.
- 1.3.3. Déanfar na háiseanna agus a gcóras soláthair cumhachta leictreachais a dheardh sa chaoi nach mbeidh sé mar thoradh orthu, i gcás ina dtarlaíonn cliseadh, go dtabharfar faisnéis mhí-oiriúnach, mhíthreorach nó uireasach d'úsáideoirí ná go gcuirfear isteach ar sheirbhís fhíor-riachtanach.
- 1.3.4. Déanfar meáin oiriúnacha chosanta a sholáthar chun damáiste do na háiseanna sin, nó cur isteach orthu, a sheachaint.
- 1.3.5. Ní chuirfidh foinsí radaíochta ná nithe gluaiste ná nithe seasta isteach ar fheidhmiú na gcóras cumarsáide, loingseoireachta agus faireachais aerloingseoireachta.
- 1.3.6. Déanfar faisnéis faoi oibriú agus úsáid trealamh aeradróim a chur ar fáil don fhoireann ábhartha, lena n-áireofar cur síos soiléir ar na dálaí a d'fhéadfadh rioscaí do-ghlactha a chruthú maidir le sábháilteacht eitlíochta.

1.4. Sonraí aeradróim

- 1.4.1. Déanfar sonraí ábhartha maidir leis an aeradróm agus leis na seirbhísí atá ar fáil a bhunú agus a choinneáil cothrom le dáta.
- 1.4.2. Beidh na sonraí sin cruinn, inléite, iomlán agus gan athbhrí. Déanfar leibhéil iomchuí sláine a choinneáil ar bun.
- 1.4.3. Déanfar na sonraí a chur ar fáil do na húsáideoirí agus do na soláthraithe ábhartha SAL go luath, agus úsáid á baint chuige sin as modh cumarsáide atá slán agus gasta.

2. OIBRÍOCHTAÍ AGUS BAINISTIÚ

2.1. Freagrachtaí an oibreora aeradróim

Is é an t-oibreoir aeradróim atá freagrach as oibriú an aeradróim. Seo a leanas freagrachtaí an oibreora aeradróim:

- (a) beidh an acmhainn is gá ag an oibreoir aeradróim, cibé acu go díreach é nó de thoradh comhaontuithe le tríú páirtithe, chun oibriú sábháilte na n-aerárthaí ag an aeradróm a áirithiú. Ar na hacmhainní sin beidh áiseanna, pearsanra, trealamh agus ábhar, doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead, cé nach iad sin amháin a bheidh i gceist;
- (b) déanfaidh an t-oibreoir aeradróim a fhíorú go mbeidh ceanglais Roinn 1 á gcomhlíonadh i gcónaí nó glacfaidh sé bearta iomchuí chun na rioscaí a bhaineann le neamhchomhlíonadh a mhaolú. Déanfar nósanna imeachta a bhunú agus a chur i bhfeidhm d'fhonn na húsáideoirí go léir a chur ar an eolas go luath maidir leis na bearta sin;
- (c) bunóidh an t-oibreoir aeradróim clár oiriúnach aeradróim maidir le bainistiú riosca ar fhiadhúlra agus cuirfidh sé an clár sin chun feidhme;
- (d) áiritheoidh an t-oibreoir aeradróim, cibé acu go díreach é nó de thoradh socrú le tríú páirtithe, go ndéanfar gluaiseacht feithiclí agus gluaiseacht daoine sa limistéar gluaiseachta agus i limistéir eile oibríochta a chomhordú le gluaiseacht aerárthaí d'fhonn imbhuailtí nó damáiste d'aerárthaí a sheachaint;
- (e) áiritheoidh an t-oibreoir aeradróim go mbunófar nósanna imeachta, más iomchuí, chun go maolófar ar na rioscaí a bhaineann le hoibríochtaí aeradróim a dhéantar sa gheimhreadh, le linn drochaimsire, nuair a bhíonn laghdú ar léargas nó san oíche, agus go gcuirfear na nósanna imeachta sin chun feidhme;
- (f) déanfaidh an t-oibreoir aeradróim socrú le heagraíochtaí ábhartha eile chun a áirithiú go gcomhlíonfar ar bhonn leanúnach na ceanglais fhíor-riachtanacha seo a bhaineann le haeradróim. Ar na heagraíochtaí sin beidh, *inter alia*, oibreoirí aerárthaí, soláthraithe seirbhísí aerloingseoireachta, soláthraithe seirbhísí láimhseála ar an talamh, soláthraithe seirbhísí bainistíochta napruin agus eagraíochtaí eile a bhféadfadh a ngníomhaíochtaí nó a dtáirgí tionchar a bheith acu ar shábháilteacht aerárthaí;
- (g) déanfaidh an t-oibreoir aeradróim a fhíorú go mbeidh nósanna imeachta i bhfeidhm ag eagraíochtaí atá bainteach le stóráil agus le dáileadh breosla d'aerárthaí d'fhonn a áirithiú go bhfuil breosla nach bhfuil éillithe agus atá ceart de réir na sonraíochta ar fáil d'aerárthaí;
- (h) cuirfear lámhleabhair maidir le cothabháil trealaimh aeradróim ar fáil, cuirfear na lámhleabhair sin i bhfeidhm sa chleachtas agus clúdófar iontu teoracha cothabhála agus deisiúcháin, faisnéis maidir le seirbhísí, fabhtcheartú agus nósanna imeachta cigireachta;
- (i) bunóidh an t-oibreoir aeradróim plean éigeandála don aeradróm, lena gclúdófar cásanna éigeandála a d'fhéadfadh bheith ann ag an aeradróm nó ina thimpeallacht, agus cuirfidh sé an plean sin chun feidhme. Déanfar an plean sin a chomhordú, más iomchuí, le plean éigeandála an phobail áitiúil;

- (j) áiritheoidh an t-oibreoir aeradróim, cibé acu go díreach é nó de thoradh comhaontuithe le tríú páirtithe, go soláthrófar seirbhísí tarrthála agus dóiteáin aeradróim leordhóthanacha. Déanfaidh na seirbhísí sin freagairt do theagmhas nó do thionóisc go pras agus cuimseoidh siad, ar a laghad, trealamh, oibreáin mhúchta dóiteáin agus líon dóthanach pearsanra;
- (k) déanfaidh an t-oibreoir aeradróim pearsanra cuícháilithe agus cuí-oilte, agus iad sin amháin, a fhostú i gcomhair oibríochtaí aeradróim agus oibríochtaí cothabhála, agus áiritheoidh sé, cibé acu go díreach é nó de thoradh comhaontuithe le tríú páirtithe, go gcuirfear cláir oiliúna agus seiceála chun feidhme agus go ndéanfar iad a choinneáil ar bun d'fhonn a áirithiú go leanfaidh an pearsanra ábhartha uile de bheith inniúil;
- (l) Aon duine a gceadaítear rochtain gan tionlacan dó nó di ar limistéar gluaiseachta nó ar limistéir oibríochta eile, áiritheoidh an t-oibreoir aeradróim go mbeidh sé nó sí cuí-oilte agus cuícháilithe le haghaidh na rochtana sin;
- (m) beidh an pearsanra tarrthála agus an pearsanra comhraic dóiteáin cuí-oilte agus cuícháilithe chun oibriú i dtimpeallacht an aeradróim. Déanfaidh an t-oibreoir aeradróim cláir oiliúna agus seiceála a chur chun feidhme agus a choinneáil ar bun d'fhonn a áirithiú go leanfaidh an pearsanra sin de bheith inniúil; agus
- (n) déanfaidh an pearsanra tarrthála agus an pearsanra comhraic dóiteáin go léir, a bhféadfadh sé go mba ghá dóibh gníomhú in éigeandálaí eitlíochta, a ndea-shláinte chun a bhfeidhmeanna a chur i gcrích go sásúil a léiriú go tréimhsiúil, agus cineál na gníomhaíochta á chur san áireamh. Sa chomhthéacs sin, ciallaíonn dea-shláinte, lena gcuimsítear dea-shláinte choirp agus mheabhrach, nach bhfuil aon ghalar ná aon mhíchumas ar an duine seo den phearsanra a d'fhágfadh nach mbeadh sé in ann:
 - na cúraimí is gá chun oibriú i gcásanna éigeandála eitlíochta a chur i gcrích;
 - na dualgais a shanntar dó tráth ar bith a dhéanamh; nó
 - a thimpeallacht a bhrath i gceart.

2.2. Córais bhainistíochta

- 2.2.1. Más iomchuí de réir an chineáil gníomhaíochta a dhéanfar agus mhéid na heagraíochta féin, ní mór don oibreoir aeradróim córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha seo, go ndéanfar rioscaí sábháilteachta a bhainistiú agus go bhféachfar leis an gcóras sin a fheabhsú ar bhonn leanúnach.
- 2.2.2. Déanfaidh an t-oibreoir aeradróim córas tuairiscithe tarluithe a bhunú mar chuid den chóras bainistíochta faoi phointe 2.2.1 d'fhonn cur leis an iarracht cúrsaí sábháilteachta a fheabhsú go leanúnach. Beidh na páirtithe atá liostaithe i bpointe 2.1(f) thuas i gceist in anailísiú na faisnéise a éiríonn as an gcóras tuairiscithe tarluithe, más iomchuí. Beidh an córas tuairiscithe tarluithe i gcomhréir le Rialachán (AE) 376/2014.
- 2.2.3. Déanfaidh an t-oibreoir aeradróim lámhleabhar a fhorbairt don aeradróm agus oibreoidh sé i gcomhréir leis an lámhleabhar sin. Beidh sa lámhleabhar sin na teoracha, an fhaisnéis agus na nósanna imeachta uile is gá don aeradróm, don chóras bainistíochta agus iad siúd is gá chun gur féidir leis an bpearsanra oibríochtaí a gcuid dualgas a chomhlíonadh.

3. TIMPEALLAIGHT AERADRÓIM

- 3.1. Déanfar an t-aerspás timpeall ar limistéir gluaiseachta aeradróim a chosaint ar chonstaicí ionas go bhféadfar na hoibríochtaí aerárthaí atá beartaithe a dhéanamh ag na haeradróim gan riosca do-ghlactha a chruthú mar thoradh ar chonstaicí a thiocthadh chun cinn mórthimpeall an aeradróim. Déanfar dromchlaí faireacháin constaicí a fhorbairt agus a chur chun feidhme, dá bhrí sin, agus déanfar faireachán orthu go leanúnach chun aon chur isteach ar na dromchlaí sin a shainaithint.
 - (a) Beidh gá le measúnú chun a shuí an gcruthaíonn aon chur isteach a dhéantar ar na dromchlaí sin riosca do-ghlactha. Bainfear amach aon ní ar riosca do-ghlactha é nó déanfar gníomhaíocht mhaolaithe iomchuí chun na haerárthaí a úsáideann an t-aeradróm a chosaint.
 - (b) Déanfar aon cheann de na constaicí sin a bheidh fágtha ar an dromchla a chur in iúl i bhfoilseachán agus, de réir an riachtanais a bheidh leis, déanfar é a mharcáil agus, nuair is gá, déanfar infheicthe é trí bhíthin soilse.
- 3.2. Déanfar faireachán ar ghuaiseacha a bhaineann le gníomhaíochtaí an duine agus le húsáid talún, amhail na míreanna ar an liosta seo a leanas, cé nach liosta cuimsitheach é: Déanfar an riosca a chruthófar dá ndroim a mheasúnú agus a mhaolú más iomchuí:
 - (a) aon fhorbairt ar úsáid talún nó aon athrú ar úsáid talún i limistéar an aeradróim;
 - (b) aon suaiteacht a d'fhéadfadh teacht chun cinn i ngeall ar chonstaicí;
 - (c) úsáid soilse guaiseacha, mearbhallacha agus míthreoracha;
 - (d) dallraitheacht i ngeall ar dhromchlaí móra an-fhrithchaiteach;
 - (e) cruthú limistéar a d'fhéadfadh gníomhaíochtaí fiadhúlra a spreagadh mórthimpeall limistéar gluaiseachta an aeradróim; nó
 - (f) foinsí radaíochta dofheicthe nó nithe gluaiseachta nó nithe seasta a d'fhéadfadh cur isteach ar fheidhmíocht na gcóras cumarsáide, loingseoireachta agus

faireachais aerloingseoireachta, nó a bhféadfadh drochthionchar a bheith acu ar an bhfeidhmíocht sin.

- 3.3. Déanfar plean éigeandála an phobail áitiúil a bhunú i gcomhair cásanna éigeandála eitleachta a d'fhéadfadh teacht chun cinn i limistéar áitiúil an aeradróim.

4. SEIRBHÍSÍ LÁIMHSEÁLA AR AN TALAMH

4.1. Freagrachtaí an tsoláthraí seirbhísí láimhseála ar an talamh

Tá an soláthraí seirbhíse láimhseála ar an talamh freagrach as oibriú sábháilte a chuid gníomhaíochtaí ag an aeradróm. Seo a leanas freagrachtaí an tsoláthraí:

- (a) beidh na hacmhainní is gá ag an soláthraí, cibé acu go díreach é nó de thoradh comhaontuithe le tríú páirtithe, chun soláthar sábháilte na seirbhíse ag an aeradróm a áirithiú. Ar na hacmhainní sin beidh áiseanna, pearsanra, trealamh agus ábhar, comhlíonadh nósanna imeachta an oibreora aeradróim áitiúil, doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead, agus nithe eile nach iad;
- (b) áiritheoidh an soláthraí go ndéanfar gluaiseacht na bhfeithiclí agus na ndaoine sin a bhaineann leis sa limistéar gluaiseachta agus i limistéir eile oibríochta a chomhordú le gluaiseachtaí aerárthaí d'fhonn imbhuailtí nó damáiste d'aerárthaí a sheachaint;
- (c) áiritheoidh an soláthraí go mbunófar, más iomchuí, nósanna imeachta chun go maolófar ar na rioscaí a bhaineann le hoibríochtaí aeradróim a dhéantar sa gheimhreadh, le linn drochaimsire, nuair a bhíonn laghdú ar léargas nó san oíche, agus go gcuirfear na nósanna imeachta sin chun feidhme;
- (d) déanfaidh an soláthraí socrúithe le heagraíochtaí ábhartha eile chun a áirithiú go gcomhlíonfar ar bhonn leanúnach na ceanglais fhíor-riachtanacha sin a bhaineann le haeradróim. Ar na heagraíochtaí sin beidh, *inter alia*, oibreoirí aeradróim, oibreoirí aerárthaí, soláthraithe seirbhísí aerloingseoireachta agus eagraíochtaí eile a bhféadfadh a ngníomhaíochtaí nó a dtáirgí difear a dhéanamh do shábháilteacht aerárthaí;
- (e) áiritheoidh an soláthraí, bíodh sin uaidh féin nó de thoradh comhaontuithe le tríú páirtithe, go mbeidh nósanna imeachta ann chun breosla nach bhfuil éillithe agus atá ceart de réir na sonraíochta a sholáthar d'aerárthaí;
- (f) áiritheoidh an soláthraí go mbeidh lámhleabhair maidir le cothabháil trealamh ar fáil, go gcuirfear na lámhleabhair sin i bhfeidhm sa chleachtas agus go gclúdófar iontu teoracha cothabhála agus deisiúcháin, faisnéis maidir le seirbhísí, fabhtcheartú agus nósanna imeachta cigireachta;
- (g) déanfaidh an soláthraí pearsanra cuícháilithe agus cuí-oilte, agus iad sin amháin, a fhostú agus déanfaidh sé cláir oiliúna agus seiceála a chur chun feidhme agus a choinneáil ar bun d'fhonn a áirithiú go leanfaidh an pearsanra ábhartha uile de bheith inniúil.

4.2. Córais bhainistíochta

- 4.2.1. Más iomchuí de réir an chineáil gníomhaíochta a dhéanfar agus mhéid na heagraíochta féin, ní mór don soláthraí córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha

seo, go ndéanfar rioscaí sábháilteachta a bhainistiú agus go bhféachfar leis an gcóras seo a fheabhsú go leanúnach.

- 4.2.2. Déanfaidh an soláthraí córas tuairiscithe tarluithe a bhunú mar chuid den chóras bainistíochta faoi phointe 4.2.1 d'fhonn cur leis an gcuspóir maidir le cúrsaí sábháilteachta a fheabhsú go leanúnach. Beidh na páirtithe atá liostaithe i bpointe 4.1(d) thuas i gceist in anailísiú na faisnéise a éiríonn as an gcóras tuairiscithe tarluithe, más iomchuí. Beidh an córas tuairiscithe tarluithe i gcomhréir le Rialachán (AE) 376/2014.
- 4.2.3. Déanfaidh an soláthraí lámhleabhar a fhorbairt don tseirbhís láimhseála ar an talamh agus oibreoidh sé i gcomhréir leis an lámhleabhar sin. Beidh sa lámhleabhar sin na teoracha, an fhaisnéis agus na nósanna imeachta uile is gá don tseirbhís, don chóras bainistíochta agus chun gur féidir do phearsanra na seirbhíse a gcuid dualgas a chomhlíonadh.

5. EILE

Déanfaidh an t-oibreoir aeradróim a áirithiú nach mbainfidh aerárthaí nach mbíonn dearadh agus nósanna imeachta oibríochta an aeradróim sin beartaithe dóibh de ghnáth úsáid as an aeradróm ná as codanna den aeradróm, ach amháin i gcásanna éigeandála aerárthaigh, nuair a chuirtear aerárthach ar mhalairt slí chuig aeradróm eile, nó faoi dhálaí eile a bheidh sonraithe i ngach cás ar leith.

IARSCRÍBHINN VIII

Ceanglais fhíor-riachtanacha maidir le BAT/SAL agus rialtóirí aerthrachta

1. ÚSÁID AN AERSPÁIS

- 1.1. Déanfar gach aerárthach, seachas na haerárthaí sin atá ag gabháil do na gníomhaíochtaí dá dtagraítear in Airteagal 2(3)(a), le linn gach céime den eitilt nó le linn dóibh a bheith ar limistéar gluaiseachta aeradróim, a oibriú i gcomhréir le comhrialacha ginearálta oibriúcháin agus i gcomhréir le haon nós imeachta infheidhme a bheidh sonraithe maidir le húsáid an aerspáis sin.
- 1.2. Beidh gach aerárthach, seachas na haerárthaí sin atá ag gabháil do na gníomhaíochtaí dá dtagraítear in Airteagal 2(3)(a), feistithe leis na comhdhamhnaí is gá agus oibreofar dá réir iad. Comhlíonfaidh na comhdhamhnaí a úsáidtear i gcóras BAT/SAL na ceanglais i bpointe 3 freisin.

2. SEIRBHÍSÍ

2.1. Faisnéis aerloingseoireachta agus sonraí d'úsáideoirí aerspáis chun críocha aerloingseoireachta

- 2.1.1. Beidh na sonraí a úsáidfear mar fhoinse faisnéise aerloingseoireachta ar cháilíocht leordhóthanach, iomlán agus cothrom le dáta agus soláthrófar iad go luath.
- 2.1.2. Beidh an fhaisnéis aerloingseoireachta cruinn, iomlán, cothrom le dáta, gan athbhrí agus slán a dóthain, agus beidh sí i bhformáid a bheidh oiriúnach d'úsáideoirí.
- 2.1.3. Déanfar an fhaisnéis aerloingseoireachta sin a scaipeadh ar úsáideoirí aerspáis go luath agus bainfear úsáid as modh cumarsáide a bheidh iontaofa agus gasta a dhóthain, ar modh é a bheidh cosanta ar chur isteach agus ar éilliú.

2.2. Faisnéis mheitéareolaíochta

- 2.2.1. Beidh na sonraí a úsáidfear mar fhoinse faisnéise meitéareolaíochta aerloingseoireachta ar cháilíocht leordhóthanach, iomlán agus cothrom le dáta.
- 2.2.2. A mhéid is féidir, beidh an fhaisnéis mheitéareolaíochta aerloingseoireachta cruinn, iomlán, cothrom le dáta, slán a dóthain agus gan athbhrí d'fhonn riachtanais úsáideoirí an aerspáis a chomhlíonadh.
- 2.2.3. Déanfar an fhaisnéis mheitéareolaíochta aerloingseoireachta sin a scaipeadh ar úsáideoirí aerspáis go luath agus bainfear úsáid as modh cumarsáide iontaofa agus gasta a dhóthain a bheidh cosanta ar chur isteach agus ar éilliú.

2.3. Seirbhísí aerthrachta

- 2.3.1. Beidh na sonraí a úsáidfear mar fhoinse chun seirbhísí aerthrachta a sholáthar ceart, iomlán agus cothrom le dáta.
- 2.3.2. Beidh na seirbhísí aerthrachta cruinn, iomlán, cothrom le dáta agus gan athbhrí oiread is a áiritheoidh go gcomhlíonfaidh siad riachtanais sábháilteachta na n-úsáideoirí.
- 2.3.3. Déanfar uirlisí uathoibrithe a thugann faisnéis nó comhairle d'úsáideoirí a dhearadh, a mhonarú agus a chothabháil go hiomchuí chun a áirithiú go mbeidh siad oiriúnach don sprioc atá leo.

- 2.3.4. Forálfaidh seirbhísí rialaithe aerthrachta agus próisis ghaolmhara go mbeidh spás leormhaith idir aerárthaí agus, i limistéar ainlithe eiltle an aeradróim, coiscfidh siad imbhuailtí idir aerárthaí agus baic agus, más iomchuí, cabhróidh siad lena gcosaint ar ghuaiseacha aeriompartha eile agus áiritheoidh siad go ndéanfar comhordú pras agus luath i gcomhar leis na húsáideoirí ábhartha go léir agus leis na méideanna aerspáis cóngaracha go léir.
- 2.3.5. An chumarsáid idir na seirbhísí aerthrachta agus aerárthaí agus idir na haonaid ábhartha seirbhísí aerthrachta, beidh sí luath, soiléir, ceart agus gan athbhrí agus beidh sí cosanta ar chur isteach agus beidh sí sothuigthe gan dua agus, más infheidhme, aitheanta ag na gníomhairí go léir lena mbaineann.
- 2.3.6. Beidh modhanna i bhfeidhm chun cásanna éigeandála a d'fhéadfadh bheith ann a bhrath agus, más iomchuí, chun gníomhaíocht chuardaigh agus tarrthála éifeachtach a chur ar bun. Cuimseoidh na modhanna sin, ar a laghad, meicníochtaí iomchuí rabhaidh, bearta agus nósanna imeachta comhordúcháin, modhanna agus pearsanra chun an réimse freagrachta a chuimsiú go héifeachtúil.

2.4. Seirbhísí cumarsáide

Déanfaidh na seirbhísí cumarsáide feidhmíocht leordhóthanach a bhaint amach agus a choinneáil ar bun chomh fada agus a bhaineann lena n-infhaighteacht, lena sláine, lena leanúnachas agus lena luas. Beidh siad gasta agus déanfar iad a chosaint ar éilliú.

2.5. Seirbhís aerloingseoireachta

Déanfaidh an tseirbhís aerloingseoireachta leibhéal leordhóthanach feidhmíochta a bhaint amach agus a choinneáil ar bun maidir le treoir, aimsiú suímh agus faisnéis uainiúcháin, nuair atá an fhaisnéis sin ar fáil. Áirítear ar na critéir feidhmíochta beachtas, sláine, infhaighteacht agus leanúnachas na seirbhíse.

2.6. Seirbhís faireachais

Déanfaidh na seirbhísí faireachais amach cá bhfuil suímh na n-aerárthaí faoi seach atá san aer, mar aon le suímh aerárthaí eile agus feithiclí talún ar dhromchla an aeradróim, agus déanfaidh siad an méid sin ar leibhéal feidhmíochta leordhóthanach chomh fada agus a bhaineann le beachtas, sláine, leanúnachas agus dóchúlacht brathadóireachta na suíomh sin.

2.7. Bainistiú na sreibhe aerthrachta

Úsáidfídh agus soláthróidh an bainistiú oirbheartaíochta ar shreabha aerthrachta ar leibhéal an Aontais faisnéis atá beacht a dóthain agus cothrom le dáta faoi mhéid agus faoi chineál an aerthrachta bheartaithe a dhéanfaidh difear do sholáthar seirbhísí agus déanfaidh sé comhordú agus caibidlíocht ar athródú nó moilliú na sreabh aerthrachta d'fhonn an riosca go dtarlódh ró-ualú san aer nó sna haeradróim a laghdú. Déanfar bainistiú sreibhe d'fhonn an leas is fearr is féidir a bhaint as an acmhainn atá ar fáil ó thaobh úsáid aerspáis de agus feabhas a chur ar phróisis bhainistíochta an tsreafa aerthrachta. Beidh sé bunaithe ar shábháilteacht, ar thrédhearcacht agus ar éifeachtúlacht, rud a áiritheoidh go gcuirfear an acmhainn ar fáil ar mhodh solúbtha luath atá comhsheasmhach leis an bPlean Eorpach Aerloingseoireachta.

Tacóidh na bearta dá dtagraítear in Airteagal 12(7), maidir le bainistiú na sreibhe aerthrachta, le cinntí oibríochtúla a dhéanfaidh soláthraithe seirbhísí aerthrachta, oibreoirí aerfoirt agus úsáideoirí aerspáis agus clúdóidh siad na réimsí seo a leanas:

- (a) pleanáil eitiltí;
- (b) úsáid na hacmhainneachta aerspáis atá ar fáil le linn gach céim den eitilt, lena n-áirítear sliotáin a shannadh;
- (c) úsáid a bhaint as ródúcháin i ngnáth-aerthrácht, lena n-áirítear
 - foilseachán aonair a chruthú le haghaidh treoraíocht bhealaí agus tráchta,
 - roghanna chun an gnáth-aerthrácht a athstiúrú ó limistéir phlódaithe, agus
 - rialacha tosaíochta maidir le rochtain ar aerspás don ghnáth-aerthrácht, go háirithe i rith tréimhsí plódúcháin agus géarchéime. agus
- (d) an chomhsheasmhacht idir pleananna eitilte agus sliotáin aerfoirt agus an comhordú is gá le réigiúin chomharsanacha, más iomchuí.

2.8. Bainistiú an aerspáis

Maidir le méideanna sonracha aerspáis a ainmniú chun críocha úsáide áirithe, déanfar faireachán ar an ainmniú sin agus déanfar é a chomhordú agus a fhógairt go luath i dtreo go laghdófar an riosca go gcaillfear aon spás idir aerárthaí i ngach uile chúinse. Agus eagrú gníomhaíochtaí míleata agus gnéithe gaolmhara faoi fhreagracht na mBallstát á gcur san áireamh, tacóidh bainistiú an aerspáis freisin le cur i bhfeidhm aonfhoirmeach an choincheapa maidir le húsáid sholúbtha a bhaint as aerspás, de réir an chur síos air a rinne ICAO agus arna chur chun feidhme faoi Rialachán (CE) Uimh. (XXXX/XXX) maidir le cur chun feidhme an Aerspáis Aonair Eorpaigh (athmhúnlú), d'fhoill bainistiú an aerspáis agus bainistiú aerthráchta a éascú i gcomhthéacs an chomhbheartais iompair.

2.9. Dearadh an aerspáis

Déanfar struchtúir aerspáis agus nósanna imeachta eitiltí a dhearadh go hiomchuí agus déanfar suirbhéireacht go hiomchuí orthu agus déanfar iad a bhailíochtú go hiomchuí sula bhféadfar iad a imlonnú agus sula bhféadfaidh aerárthaí iad a úsáid.

3. CÓRAIS AGUS COMHDHAMHNAÍ

3.1. Ginearálta

Maidir leis na córais BAT/SAL agus a gcomhdhamhnaí a sholáthraíonn faisnéis ghaolmhar don aerárthach agus ón aerárthach agus ar an talamh, beidh siad deartha, monaraithe, suiteáilte, cothabháilte agus oibrithe go hiomchuí chun a áirithiú go mbeidh siad oiriúnach don chuspóir atá beartaithe dóibh.

Áireofar ar na córais agus ar na nósanna imeachta go háirithe na cinn sin a bhfuil gá leo chun tacú leis na feidhmeanna agus leis na seirbhísí seo a leanas:

- (a) Bainistiú an aerspáis
- (b) Bainistiú na sreibhe aerthráchta
- (c) Seirbhísí aerthráchta, go háirithe córais um próiseáil sonraí eitilte, córais um próiseáil sonraí faireachais agus córais um chomhéadan idir duine agus meaisín.
- (d) Córais chumarsáide lena n-áirítear cumarsáid talamh go talamh/spás, cumarsáid aer go talamh agus cumarsáid aer go haer/spás.
- (e) Loingseoireacht.

- (f) Faireachas.
- (g) Seirbhísí faisnéise aerloingseoireachta.
- (h) Faisnéis mheitéareolaíoch a úsáid.
- (i) Córais agus nósanna imeachta maidir le faisnéis mheitéareolaíoch a úsáid.

3.2. Sláine, feidhmíocht agus iontaofacht na gcóras agus na gcomhdhamhnaí

Maidir le sláine na gcóras agus na gcomhdhamhnaí agus maidir lena bhfeidhmíocht ó thaobh na sábháilteachta de, cibé acu ar aerárthach, ar an talamh nó sa spás é, beidh siad oiriúnach don chuspóir atá beartaithe dóibh. Déanfaidh siad an leibhéal feidhmíochta oibríochta is gá maidir lena ndálaí intuartha oibríochtúla go léir agus maidir lena saolré oibríochtúil iomlán a chomhlíonadh.

Déanfar córais BAT/SAL agus a gcomhdhamhnaí a dhearadh, a thógáil, a chothabháil agus a oibriú, agus úsáid á baint chuige sin as na nósanna imeachta iomchuí bailíochtaíthe, ar bhealach a áiríteoidh oibriú comhleanúnach an Ghréasáin Eorpaigh um Bainistiú Aerthráchta i gcónaí agus ag gach céim den eilt. Is féidir oibriú comhleanúnach a léiriú, go háirithe, le faisnéis a chomhroinnt, lena n-áirítear an fhaisnéis ábhartha faoin stádas oibríochta, tuiscint chomhchoiteann ar fhaisnéis, feidhmíochtaí próiseála atá inchurtha le chéile agus na nósanna imeachta a ghabhann leo a dhéanann feidhmíochtaí comhchoiteanna oibriúcháin a chumasú don Ghréasán Eorpach um Bainistiú Aerthráchta (EATMN) iomlán nó do chodanna de.

Trí bhíthin EATMN, a chórais agus a gcomhdhamhnaí, tacófar, ar bhonn comhordaithe, le coincheapa nua oibríochtúla ar ar comhaontaíodh agus a bailíochtaíodh, coincheapa lena bhfeabhsófar caighdeán, inbhuanaitheacht agus éifeachtúlacht na seirbhísí aerloingseoireachta, ó thaobh sábháilteachta agus toilleadh de go háirithe.

Trí bhíthin EATMN, a chórais agus a gcomhdhamhnaí, tacófar le comhordú sibhialta/míleata a chur chun feidhme de réir a chéile, a mhéad is gá ar mhaithe le bainistiú éifeachtach aerspáis agus sreibhe aerthráchta, agus le go mbainfidh gach úsáideoir úsáid shábháilte éifeachtúil as an aerspás, trí chur i bhfeidhm an choincheapa maidir le húsáid sholúbtha a bhaint as aerspás.

Chun na cuspóirí sin a bhaint amach, tacóidh EATMN, a chórais agus na gcomhdhamhnaí a ghabhann leo le faisnéis cheart chomhsheasmhach a chumhdóidh gach céim eilt a chomhroinnt go luath idir páirtithe sibhialta agus míleata, gan dochar do leasanna beartais slándála nó cosanta, lena n-áirítear ceanglais maidir le rúndacht.

3.3. Córais agus comhdhamhnaí a dhearadh

- 3.3.1. Déanfar córais agus comhdhamhnaí a dhearadh chun go gcomhlíonfaidh siad na ceanglais sábháilteachta is infheidhme.
- 3.3.2. Maidir le córais agus le comhdhamhnaí, arna mbreithniú i dteannta a chéile, ar leithligh agus ag féachaint don ghaol atá eatarthu, déanfar iad a dhearadh sa chaoi go mbeidh gaol inbhéartach ann idir an dóchúlacht gur cliseadh ar an gcóras iomlán a d'fhéadfadh a bheith mar thoradh ar aon chliseadh agus déine a éifeachta ar shábháilteacht na seirbhísí.
- 3.3.3. Déanfar na teorainneacha a bhaineann le hinniúlachtaí agus feidhmíocht an duine a chur san áireamh agus na córais agus na comhdhamhnaí, arna mbreithniú ar leithligh agus i gcomhcheangal lena chéile, á ndearadh;
- 3.3.4. Déanfar na córais agus na comhdhamhnaí a dhearadh sa chruth go gcosnófar iad, agus na sonraí a sheoltar leo, ó idirghníomhaíochtaí dochracha beartaithe agus neamhbheartaithe le gnéithe seachtracha agus inmheánacha.
- 3.3.5. Déanfar faisnéis atá riachtanach chun na córais agus na comhpháirteanna a mhonarú, a shuiteáil, a oibriú agus a chothabháil, mar aon le faisnéis maidir le coinníollacha neamhshábháilte, a chur ar fáil do phearsanra ar bhealach soiléir, comhsheasmhach agus gan athbhrí.

3.4. Leibhéal leanúnach seirbhíse

Déanfar leibhéal sábháilteachta na gcóras agus na gcomhdhamhnaí a choinneáil ar bun le linn seirbhíse agus tráth a dhéantar aon mhodhnuithe ar an tseirbhís;

4. CÁILÍOCHTAÍ RIALTÓIRÍ AERTHRÁCHTA

4.1. Ginearálta

Beidh duine a bhfuil oiliúint á cur air mar rialtóir aerthrachta nó mar ábhar rialtóra aerthrachta chomh haibí sin ó thaobh oideachais, coirp agus meabhrach de chun go mbeidh sé in ann an t-eolas ábhartha teoiriciúil agus an scil phraiticiúil a shealbhú, a choinneáil ar bun agus a léiriú.

4.2. Eolas teoiriciúil

- 4.2.1. Déanfaidh rialtóir aerthrachta leibhéal eolais a shealbhú agus a choinneáil ar bun, ar leibhéal eolais é a oirfidh do na feidhmeanna a dhéanfar agus a bheidh i gcomhréir leis na rioscaí a bhaineann leis an gcineál seirbhíse.
- 4.2.2. Léireofar go bhfuil eolas teoiriciúil á shealbhú agus á choinneáil ar bun trí mheasúnú leanúnach le linn na hoiliúna, nó trí scrúduithe iomchuí.
- 4.2.3. Déanfar leibhéal iomchuí eolais theoiriciúil a choinneáil ar bun. Léireofar go bhfuil comhlíonadh á dhéanamh trí mheasúnuithe rialta nó trí scrúduithe rialta. Beidh rialtacht na scrúduithe i gcomhréir leis an leibhéal riosca a bhaineann leis an gcineál seirbhíse i dtrácht.

4.3. Scil phraiticiúil

- 4.3.1. Gheobhaidh rialtóir aerthrachta na scileanna praiticiúla is iomchuí chun a chuid feidhmeanna nó a cuid feidhmeanna a chur i gcrích agus déanfaidh sé nó sí iad a choinneáil ar bun. Beidh na scileanna sin i gcomhréir leis na rioscaí a bhaineann leis an gcineál seirbhíse agus déanfaidh siad, más iomchuí i gcás na bhfeidhmeanna a fheidhmeofar, an méid seo a leanas a chumhdach:
 - (a) nósanna imeachta oibríochta;
 - (b) sainghnéithe a bhaineann leis an gcúram;
 - (c) cásanna neamhghnácha agus cásanna éigeandála; agus
 - (d) tosca a bhaineann leis an duine.
- 4.3.2. Léireoidh rialtóir aerthrachta go bhfuil sé ar a chumas na nósanna imeachta agus na cúraimí gaolmhara a chur i gcrích de réir leibhéal inniúlachta is iomchuí de réir na bhfeidhmeanna a chuirfear i gcrích.
- 4.3.3. Déanfar leibhéal sásúil inniúlachta i scil phraiticiúil a choinneáil ar bun. Fíorófar go bhfuil comhlíonadh á dhéanamh trí mheasúnuithe rialta. Beidh minicíocht na measúnuithe seo i gcomhréir leis an gcastacht agus leis an leibhéal riosca a bhaineann leis an gcineál seirbhíse agus leis na cúraimí a dhéanfar.

4.4. Inniúlacht teanga

- 4.4.1. Léireoidh rialtóir aerthrachta go bhfuil sé de chumas aige nó aici Béarla a labhairt agus a thuiscint oiread agus a ligfidh dó nó di cumarsáid a dhéanamh go héifeachtach i gcásanna guthchumarsáide amháin (guthán/raidíó-theileafón) agus i gcásanna cumarsáide "duine le duine" i dtaobh ábhair nithiúla agus ábhair a bhaineann leis an obair, lena n-áirítear cásanna éigeandála.
- 4.4.2. I gcás ina bhfuil gá leis chun seirbhísí aerthrachta (ATS) a sholáthar i méid sainithe aerspáis, beidh ar chumas rialtóra aerthrachta an teanga náisiúnta nó na teangacha náisiúnta a labhairt agus a thuiscint go dtí an leibhéal a bhfuil tuairisc tugtha thuas air.

4.5. Feistí sintéiseacha oiliúna (STD)

Nuair a bhaintear úsáid as STD chun oiliúint phraiticiúil a thabhairt san fheasacht ar dhálaí éagsúla agus i dtosca an duine nó chun a léiriú go bhfuil scileanna faighte nó coinnithe ar bun, beidh leibhéal feidhmíochta ag an bhfearas sin ar a bhféadfar ionsamhlú leordhóthanach a dhéanamh ar an timpeallacht oibre agus ar na dálaí oibríochtúla atá oiriúnach don oiliúint atá á soláthar.

4.6. Cúrsa oiliúna

- 4.6.1. Tabharfar an oiliúint i bhfoirm cúrsa oiliúna, ina bhféadfar teagasc teoiriciúil agus teagasc praiticiúil a chuimsiú, lena n-áirítear oiliúint ar STD, más infheidhme.
- 4.6.2. Déanfar cúrsa a shainiú agus a fhormheas i gcomhair gach cineáil oiliúna.

4.7. Teagascóirí

- 4.7.1. Teagascóirí cuícháilithe amháin a dhéanfaidh an teagasc teoiriciúil. Maidir leis na teagascóirí seo,
 - (a) beidh eolas iomchuí acu ar an réimse lena mbaineann an teagasc; agus
 - (b) beidh sé léirithe acu go bhfuil sé ar a gcumas modhanna teagaisc iomchuí a úsáid.
 - 4.7.2. Teagascóirí cuícháilithe, a mbeidh na cáilíochtaí seo a leanas acu, a dhéanfaidh na scileanna praiticiúla a theagasc:
 - (a) comhlíonfaidh siad na ceanglais iomchuí maidir le heolas teoiriciúil agus maidir le taithí de réir mar a oireann don teagasc atá á thabhairt;
 - (b) beidh sé léirithe acu go bhfuil ar a gcumas teagasc a dhéanamh agus modhanna teagaisc iomchuí a úsáid;
 - (c) beidh taithí acu ar theicnící teagaisc a bhaineann leis na nósanna imeachta sin ina mbeartaítear teagasc a chur ar fáil; agus
 - (d) oiliúint athnuachana a fháil go rialta chun a áirithiú go gcoinneofar na hinniúlachtaí teagaisc cothrom le dáta.
 - 4.7.3. Beidh teagascóirí scileanna praiticiúla i dteideal gníomhú mar rialtóirí aerthrachta freisin, nó beidh sé amhlaidh go raibh siad i dteideal gníomhú mar sin tráth.
- #### **4.8. Measúnóirí**
- 4.8.1. Maidir leis na daoine a bheidh freagrach as measúnú a dhéanamh ar scil na rialtóirí aerthrachta,
 - (a) beidh sé léirithe acu go bhfuil siad ábalta feidhmíocht na rialtóirí aerthrachta a mheasúnú, agus scrúduithe agus seiceálacha a dhéanamh orthu; agus
 - (b) cuirfear oiliúint athnuachana rialta orthu chun a áirithiú go gcoinneofar na caighdeáin mheasúnaithe cothrom le dáta.

- 4.8.2. Beidh measúnóirí ar scileanna praiticiúla i dteideal gníomhú mar rialtóirí aerthrachta sna réimsí sin ina bhfuil an measúnú le déanamh, nó beidh sé amhlaidh go raibh siad i dteideal gníomhú mar sin tráth.

4.9. Dea-shláinte rialtóra aerthrachta

- 4.9.1. Beidh ar gach rialtóir aerthrachta a léiriú go tráthrialta go bhfuil siad folláin a ndóthain chun a bhfeidhmeanna a chur i gcrích go sásúil. Déanfar comhlíonadh a léiriú trí mheasúnú iomchuí trína gcuirfear an meath meabhrach agus fisiceach a d'fhéadfadh bheith ann de dheasca aoise san áireamh;
- 4.9.2. Maidir le dea-shláinte a léiriú, lena gcuimsítear sláinte choirp agus mheabhrach, áireofar ann gur léiríodh nach bhfuil aon ghalar ná aon mhíchumas ar an duine a sholáthraíonn seirbhís rialaithe aerthrachta (ATC), a d'fhágfadh nach mbeadh sé in ann:
- (a) na cúraimí is gá chun seirbhís rialaithe aerthrachta a sholáthar a dhéanamh go hionchuí,
 - (b) na dualgais a shannfar dó a fheidhmiú tráth ar bith nó
 - (c) a timpeallacht nó a thimpeallacht a bhrath i gceart.
- 4.9.3. I gcás nach féidir dea-shláinte a léiriú go hiomlán, féadfar bearta maolaithe a chur i bhfeidhm lena gcuirfear sábháilteacht choibhéiseach ar fáil.

5. SOLÁTHRAITHE SEIRBHÍSÍ AGUS EAGRAÍOCHTAÍ OILIÚNA

- 5.1. Ní rachfar i mbun seirbhísí a sholáthar mura rud é go gcomhlíontar na coinníollacha seo a leanas:
- (a) beidh an acmhainn is gá le haghaidh scála agus raon na seirbhíse ag an soláthraí seirbhíse, cibé acu go díreach é nó de thoradh comhaontuithe le tríú páirtithe. Orthu sin beidh na hacmhainní seo a leanas, cé nach iad seo amháin a bheidh ann: córais, áiseanna, lena n-áirítear soláthar cumhachta, struchtúr bainistíochta, pearsanra, trealamh agus cothabháil an trealaimh sin, doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead;
 - (b) déanfaidh an soláthraí seirbhíse lámhleabhair bhainistíochta agus lámhleabhair oibríochta a fhorbairt agus a choinneáil cothrom le dáta chomh fada is a bhaineann le soláthar a chuid seirbhísí agus beidh air oibriú de réir na lámhleabhar sin. Beidh sna lámhleabhair sin na teoracha uile, an fhaisnéis uile agus na nósanna imeachta uile is gá do na hoibríochtaí, don chóras bainistíochta agus chun gur féidir leis an bpearsanra oibríochtaí a gcuid dualgas a chomhlíonadh;
 - (c) más iomchuí de réir an chineáil gníomhaíochta a dhéanfar agus mhéid na heagraíochta féin, ní mór don soláthraí seirbhíse córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha seo, go ndéanfar rioscaí sábháilteachta a bhainistiú agus go bhféachfar leis an gcóras seo a fheabhsú go leanúnach.
 - (d) is pearsanra cuícháilithe agus cuí-oilte, agus iad sin amháin, a úsáidfí an soláthraí seirbhíse agus déanfaidh siad cláir oiliúna agus seiceála a chur chun feidhme agus a choinneáil ar bun don pearsanra;

- (e) déanfaidh an soláthraí seirbhíse idirphléití foirmiúla a bhunú leis na geallshealbhóirí go léir a d'fhéadfadh tionchar díreach a imirt ar shábháilteacht a gcuid seirbhísí chun a áirithiú go gcomhlíonfar na ceanglais fhíor-riachtanacha seo;
- (f) bunóidh an soláthraí seirbhíse plean teagmhasach ina gcuimseofar cásanna éigeandála agus dálaí neamhghnácha a d'fhéadfadh titim amach maidir lena sheirbhísí, agus cuirfidh sé an plean sin chun feidhme;
- (g) déanfaidh an soláthraí seirbhíse córas tuairiscithe tarluithe a bhunú mar chuid den chóras bainistíochta faoi phointe (c) d'fhonn cur leis an gcuspóir maidir le cúrsaí sábháilteachta a fheabhsú go leanúnach. Beidh an córas tuairiscithe tarluithe i gcomhréir le Rialachán (AE) 376/2014; agus
- (h) déanfaidh an soláthraí seirbhíse socruithe chun a fhíorú go bhfuil ceanglais feidhmíochta sábháilteachta aon chórais agus aon chomhdhamhna a oibríonn sé á gcomhlíonadh tráth ar bith.

5.2. Ní rachfar i mbun seirbhís rialaithe aerthrachta a sholáthar mura rud é go gcomhlíontar na coinníollacha seo a leanas:

- (a) déanfar bainistiú trí bhíthin córas uainchláir ar chosc tuirse an phearsanra sin a sholáthraíonn seirbhís ATC. Ní mór an córas uainchláir sin a dhéileáil le tréimhsí dualgais, am dualgais agus tréimhsí scíthe oiriúnaithe. Maidir leis na srianta a bhunaítear laistigh den chóras uainchláir, tabharfar lánaird ar na tosca ábhartha a chuireann le tuirse amhail, go háirithe, easpa codlata, cur isteach ar rithim laethúil na colainne, uaireanta oíche, am dualgais carnach ar feadh tréimhsí ama áirithe chomh maith le cúraimí leithdháilte a roinntear ar an bpearsanra;
- (b) déanfar bainistiú ar chosc struis an phearsanra sin a sholáthraíonn seirbhís ATC trí bhíthin cláir oideachais agus cláir um strus a chosc;
- (c) beidh nósanna imeachta curtha ar bun ag soláthraí seirbhíse rialaithe aerthrachta chun a fhíorú nach lagaítear breithiúnas cognaíoch an phearsanra sin a sholáthraíonn seirbhísí rialaithe aerthrachta nó nach bhfuil siad easpach ó thaobh dea-shláinte de; agus
- (d) Maidir lena chuid pleanála agus oibríochtaí, déanfaidh an soláthraí seirbhíse rialaithe aerthrachta srianta oibríochtúla agus teicniúla, mar aon le prionsabail a bhaineann le tosca an duine, a chur san áireamh.

5.3. Ní rachfar i mbun seirbhís chumarsáide, loingseoireachta agus/nó faireachais a sholáthar mura rud é go gcomhlíontar an coinníoll seo a leanas:

Déanfaidh an soláthraí seirbhíse úsáideoirí ábhartha an aerspáis agus na haonaid ATS a choinneáil ar an eolas ar bhonn luath maidir le stádas oibríochta a sheirbhísí (agus maidir le haon athruithe ar an stádas sin) arna sholáthar chun críocha ATS.

5.4. Eagraíochtaí oiliúna

Déanfaidh eagraíocht oiliúna a chuireann oiliúint ar phearsanra a sholáthraíonn seirbhís ATC na ceanglais seo a leanas a chomhlíonadh:

- (a) ní mór gach acmhainn is gá a bheith acu maidir le raon na bhfreagrachtaí sin a bhaineann lena ngníomhaíocht. Orthu sin beidh na hacmhainní seo a leanas, cé nach iad seo amháin a bheidh ann: áiseanna, pearsanra, trealamh, modheolaíocht, doiciméadú tascanna, doiciméadú freagrachtaí agus

doiciméadú nósanna imeachta, rochtain ar shonraí ábhartha agus coimeád taifead;

- (b) más iomchuí de réir na hoiliúna a chuirfear ar fáil agus mhéid na heagraíochta féin, ní mór don eagraíocht córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha seo, go ndéanfar rioscaí sábháilteachta a bhainistiú agus go bhféachfar leis an gcóras seo a fheabhsú go leanúnach; agus
- (c) socruithe le heagraíochtaí ábhartha eile a bhunú, más gá, chun a áirithiú go gcomhlíonfar na ceanglais fhíor-riachtanacha seo ar bhonn leanúnach.

6. SCRÚDAITHEOIRÍ AERLEIGHIS AGUS IONAIÐ AERLEIGHIS

6.1. Scrúdaitheoirí aerleighis

Maidir le scrúdaitheoirí aerleighis,

- (a) ní mór dóibh a bheith cáilithe agus ceadúnaithe i gcleachtadh leighis;
- (b) ní mór oiliúint a bheith orthu sa leigheas eitlíochta chomh maith le hoiliúint athnuachana rialta sa leigheas eitlíochta a fháil chun a áirithiú go gcoinneofar ardchaighdeán mheasúnaithe cothrom le dáta; agus
- (c) ní mór eolas praiticiúil agus taithí phraiticiúil a bheith acu ar na dálaí faoina gcuireann rialtóirí aerthráchta a gcuid dualgas i gcrích.

6.2. Ionaid Aerleighis

Ní mór ionaid aerleighis na coinníollacha seo a leanas a chomhlíonadh:

- (a) ní mór gach acmhainn a bheith acu is gá le haghaidh raon na bhfreagrachtaí sin a ghabhann lena bpríbhleáidí. Orthu sin beidh na hacmhainní seo a leanas, cé nach iad seo amháin a bheidh ann: áiseanna, pearsanra, trealamh, uirlisí agus ábhar, doiciméadú tascanna, doiciméadú freagrachtaí agus doiciméadú nósanna imeachta, rochtain ar shonraí ábhartha agus coimeád taifead;
- (b) más iomchuí de réir an chineáil gníomhaíochta a dhéanfar agus mhéid na heagraíochta féin, ní mór córas bainistíochta a chur chun feidhme agus a choinneáil ar bun chun a áirithiú go gcomhlíonfar na ceanglais fhíor-riachtanacha sin, go ndéanfar rioscaí sábháilteachta a bhainistiú agus go bhféachfar leis an gcóras sin a fheabhsú go leanúnach; agus
- (c) bunóidh siad socruithe le heagraíochtaí ábhartha eile, más gá, chun a áirithiú go gcloífead leis na ceanglais seo ar bhonn leanúnach.

IARSCRÍBHINN IX

Ceanglais fhíor-riachtanacha maidir le haerárthaí gan foireann

1. CEANGLAIS FHÍOR-RIACHTANACHA MAIDIR LE DEARADH, TÁIRGEADH, COTHABHÁIL AGUS OIBRIÚ AERÁRTHAÍ GAN FOIREANN

- (a) Ní mór don duine a bhfuil an t-aerárthach gan foireann á oibriú aige a bheith ar an eolas faoi na rialacha is infheidhme de chuid an Aontais agus faoi na rialacha náisiúnta is infheidhme a bhaineann leis na hoibríochtaí atá beartaithe, go háirithe chomh fada is a bhaineann na rialacha sin le sábháilteacht, príobháideachas, cosaint sonraí, dliteanas, árachas, slándáil agus caomhnú an chomhshaoil. Ní mór don duine sin bheith in ann sábháilteacht na hoibríochta a áirithiú agus ní mór dó bheith ábalta a áirithiú freisin go mbeidh spás imleor le haghaidh sábháilteachta idir an t-aerárthach gan foireann agus daoine ar an talamh agus úsáideoirí eile an aerspáis. Áirítear leis sin eolas a bheith aige ar na treoracha oibriúcháin arna gcur ar fáil ag an monaróir agus ar fheidhmiúlachtaí ábhartha uile an aerárthaigh gan foireann, ar na rialacha aeir is infheidhme agus ar nósanna imeachta BAT/SAL.
- (b) Ní mór aerárthach gan foireann a dhearadh agus a thógáil sa dóigh go mbeidh sé oiriúnach don fheidhm a bheidh aige agus sa dóigh gur féidir é a oibriú, a choigeartú agus a chothabháil gan daoine a chur i mbaol nuair a bheidh na hoibríochtaí sin á gcur i gcrích faoi na dálaí ar dearadh an t-aerárthach ina gcomhair.
- (c) Más gá rioscaí a mhaolú i dtaca le sábháilteacht, príobháideachas, cosaint sonraí pearsanta, slándáil agus an comhshaol, ar rioscaí iad a bhaineann le hoibriú an aerárthaigh, ní mór na sainghnéithe comhfhreagracha agus na sainfheidhmiúlachtaí comhfhreagracha a bheith ag roinnt le haerárthach gan foireann lena gcuirtear san áireamh prionsabal an príobháideachais agus prionsabal na cosanta sonraí pearsanta d'aon ghnó agus mar ghnáthchuid den chóras. De réir mar a bheidh gá leis, ní mór a áirithiú trí bhíthin na ngnéithe agus na bhfeidhmiúlachtaí sin gur féidir an t-aerárthach, agus cineál agus cuspóir na hoibríochta, a shainaithint go héasca; agus ní mór a áirithiú dá mbíthin go mbeidh na teorainneacha, na toirmisc nó na dálaí is infheidhme á gcomhlíonadh, go háirithe maidir le hoibriú an aerárthaigh i gcriosanna geografacha faoi leith, thar achair áirithe ón oibreoir agus ag airdí faoi leith.

2. CEANGLAIS FHÍOR-RIACHTANACHA BHREISE MAIDIR LE DEARADH, TÁIRGEADH, COTHABHÁIL AGUS OIBRIÚ AERÁRTHAÍ GAN FOIREANN DÁ DTAGRÁITEAR IN AIRTEAGAL 46(1) AGUS (2)

Ní mór na ceanglais seo a leanas a chomhlíonadh d'fhonn leibhéal sásúil sábháilteachta a áirithiú do dhaoine ar an talamh agus d'úsáideoirí eile an aerspáis le linn don aerárthach gan foireann bheith á oibriú, agus leibhéal riosca na hoibríochta á chur san áireamh, más gá:

2.1. Aerfhiúntas

- (a) Ní mór gnéithe deartha nó mionsonraí deartha a bheith ag roinnt le haerárthaí gan foireann ar léir ón taithí a fuarthas ar na gnéithe agus na mionsonraí sin go dtí seo go bhfuil siad sábháilte don oibreoir nó do thríú páirtithe ar an talamh.
- (b) Maidir leis an tsláine táirge a bhaineann le haerárthaí gan foireann ní mór í a bheith comhréireach leis an riosca a ghabhann leis na dálaí eitilte intuartha uile.

- (c) Ní mór an t-aerárthach gan foireann a bheith inrialaithe agus so-innealta go sábháilte, de réir mar a bheidh gá leis faoi na dálaí intuartha oibríochtúla go léir lena n-áirítear i ndiaidh do cheann amháin de na córais, nó, más iomchuí, do níos mó ná ceann amháin de na córais, cliseadh. Ní mór dálaí a bhfuil gné dhaonna ag baint leo a chur san áireamh go hiomchuí, go háirithe i dtaca leis an eolas atá ar fáil faoi chúinsí a chuidíonn le daoine an teicneolaíocht lena mbaineann a oibriú go sábháilte.
- (d) Maidir le córais, trealamh agus trealamh neamhshuiteáilte gaolmhar an aerárthaigh gan foireann, lena n-áirítear córais tiomána agus an trealamh is gá chun na haerárthaí gan foireann a oibriú go cianda, ní mór iad a bheith in ann feidhmiú mar atá beartaithe faoi aon dálaí oibríochtúla ar féidir coinne a bheith leo, le linn na hoibríochta ar dearadh na haerárthaí sin ina comhair, agus lasmuigh di, ar bhealach leordhóthanach.
- (e) Maidir le córais, trealamh agus trealamh neamhshuiteáilte gaolmhar an aerárthaigh gan foireann, lena n-áirítear córais tiomána agus an trealamh is gá chun na haerárthaí gan foireann a oibriú go cianda, arna meas iontu féin agus ó thaobh an ghaoil atá eatarthu, ní mór iad a dhearadh sa dóigh go mbeadh an dóchúlacht go mbeidh drochbhail orthu as a n-eascródh cliseadh agus déine na héifeachta a bheadh aici sin ar dhaoine ar an talamh agus ar úsáideoirí eile an aerspáis, go mbeidís araon i gcomhréir le riosca na hoibríochta, arna mheasúnú ar bhonn na bprionsabal atá leagtha síos in Airteagal 4(2).
- (f) Aon trealamh arb é is feidhm dó aerárthaí gan foireann a oibriú go cianda agus a bhaineann le hoibriú an aerárthaigh, ní mór é a bheith socraithe chun oibríochtaí eiltilte a éascú, lena n-áirítear feasacht staide a chur ar fáil, agus chun aon staid nó aon éigeandálaí a bhfuiltear ag súil leo a bhainistiú.
- (g) Ní mór don eagraíocht atá freagrach as dearadh nó as margú na n-aerárthaí gan foireann eolas a chur ar fáil d'oibreoir aerárthaigh den sórt sin agus, más iomchuí, don eagraíocht chothabhála maidir leis an gcineál gníomhaíochtaí ar dearadh an t-aerárthach gan foireann ina comhair maille leis na srianta a bhaineann leis agus aon eolas is gá chun an t-aerárthach a oibriú go sábháilte, lena n-áirítear feidhmiú oibríochtúil agus comhshaoil, treoracha i leith aeracmhainneachta agus nósanna imeachta éigeandála. Cuirfear an t-eolas sin ar fáil ar bhealach soiléir, comhsheasmhach agus gan athbhrí. Chomh fada le haerárthaí gan foireann ar féidir iad a úsáid in oibríochtaí nach gá deimhniú nó dearbhú ina leith, ní mór srian a chur lena n-acmhainní oibríochtúla sa dóigh go gcomhlíonfaidh siad na rialacha aerspáis is infheidhme maidir le hoibríochtaí den sórt sin.
- (h) I gcás eagraíochtaí atá bainteach le dearadh aerárthaí gan foireann, le dearadh inneall agus le dearadh lián, ní mór dóibh réamhchúraimí, ar léir ón taithí a fuarthas orthu go dtí seo go mbíonn tionchar dearfach acu ar chúrsaí sábháilteachta, a ghlacadh d'fhonn guaiseacha a eascróidh as dálaí seachtracha agus inmheánacha a bhaineann le haerárthaí gan foireann agus lena gcórais a laghdú. Áirítear leis sin an t-aerárthach gan foireann a chosaint ar chur isteach trí mheán leictreonach.
- (i) Ní mór airíonna leordhóthanacha inatáirgthe agus feidhmiú leordhóthanach inatáirgthe, atá i gcomhréir leis na hairíonna deartha, a theacht as na próisis, na hábhair agus na comhpháirteanna lena monaraítear an t-aerárthach gan foireann.

2.2. Eagraíochtaí

Ní mór d'eagraíochtaí atá bainteach le dearadh aerárthaí, lena dtáirgeadh, lena gcothabháil, lena n-oibriú, agus le seirbhísí gaolmhara agus le hoiliúint ghaolmhar na ceanglais seo a leanas a chomhlíonadh:

- (a) Ní mór na hacmhainní is gá a bheith ag an eagraíocht le haghaidh a raoin oibre agus ní mór di a áirithiú go gcomhlíonfar na ceanglais fhíor-riachtanacha agus na rialacha mionsonraithe comhfhreagracha a bhaineann leo a bunaíodh i gcomhréir le hAirteagal 47 agus is ábhartha don ghníomhaíocht.
- (b) Ní mór don eagraíocht córas bainistíochta a chur i bhfeidhm agus a choinneáil ar bun d'fhonn a áirithiú go gcomhlíonfar na ceanglais fhíor-riachtanacha iomchuí, rioscaí sábháilteachta a bhainistiú agus iarracht a dhéanamh feabhas a chur go leanúnach ar an gcóras seo. Ní mór an córas bainistíochta sin a bheith oiriúnach do chineál gníomhaíochta na heagraíochta agus do mhéid na heagraíochta.
- (c) Ní mór don eagraíocht córas tuairiscithe tarluithe a bhunú mar chuid den chóras bainistíochta d'fhonn rannchuidiú leis an tsábháilteacht a fheabhsú go leanúnach. Beidh an córas tuairiscithe tarluithe i gcomhréir le Rialachán (AE) 376/2014. Beidh an córas tuairiscithe tarluithe sin oiriúnach do chineál gníomhaíochta na heagraíochta agus do mhéid na heagraíochta.
- (d) Ní mór don eagraíocht socruithe le heagraíochtaí eile a bhunú, más iomchuí, d'fhonn a áirithiú go gcloífeadh leis na ceanglais fhíor-riachtanacha ábhartha ar bhonn leanúnach.

2.3. Daoine atá i mbun aerárthach gan foireann a oibriú

Beidh ag an duine atá i mbun aerárthach gan foireann a oibriú an t-eolas agus na scileanna is gá d'fhonn sábháilteacht na hoibríochta a áirithiú, agus é sin i gcomhréir leis an riosca a bhaineann leis an gcineál oibríochta atá i gceist. Léireoidh an duine sin freisin go bhfuil sé folláin a dhóthain, más gá sin chun na rioscaí a bhaineann leis an oibríocht atá i gceist a mhaolú.

2.4. Oibríochtaí

Tá oibreoir aerárthaigh gan foireann freagrach as an aerárthach sin a oibriú agus ní mór dó aon bhearta iomchuí a dhéanamh ar mhaithe le sábháilteacht na hoibríochta.

Ní mór eitilt a dhéanamh i gcomhréir leis na dlíthe, na rialacha agus na nósanna imeachta is infheidhme maidir le comhlíonadh a ndualgas agus atá forordaithe don limistéar, don aerspás, do na haeradróim agus do na suíomhanna a bhfuil sé i gceist feidhm a bhaint astu, agus, más infheidhme, na córais BAT/SAL lena mbaineann.

- (a) Ní mór oibríochtaí i gcás aerárthaí gan foireann sábháilteacht tríú páirtithe ar an talamh agus sábháilteacht úsáideoirí eile an aerspáis a áirithiú chomh maith le rioscaí a laghdú a eascróidh as dálaí seachtracha dochracha agus dálaí inmheánacha dochracha, lena n-áirítear coinníollacha comhshaoil, trí spás iomchuí scoite a choinneáil ag gach céim den eitilt.
- (b) Ní ceadmhach aerárthaí gan foireann a oibriú muna mbeidh siad i staid aeracmhainneach agus muna mbeidh na comhpháirteanna agus na seirbhísí is gá le haghaidh na hoibríochta atá i gceist ar fáil agus inseirbhíse.
- (c) Ní mór d'oibreoir aerárthaigh gan foireann a áirithiú go bhfuil an trealamh aerloingseoireachta, cumarsáide, faireacháin, braite agus seachanta is gá ar an

aerárthach, maille le haon trealamh eile a mheastar a bheith riachtanach d'fhonn sábháilteacht na heitilte atá i gceist a áirithiú, agus cineál na hoibríochta, rialacháin aerthrachta agus rialacha an aeir is infheidhme ag aon chéim den eitilt á gcur san áireamh.

3. CEANGLAIS FHÍOR-RIACHTANACHA COMHSHAOIL MAIDIR LE HAERÁRTHAÍ GAN FOIREANN

Comhlíonfaidh aerárthaí gan foireann na ceanglais feidhmíochta comhshaoil a leagtar amach in Iarscríbhinn III.

IARSCRÍBHINN X

Tábla Comhghaoil

Rialachán (CE) Uimh. 216/2008	An Rialachán seo
Airteagal 1(1)	Airteagal 2(1) agus (2)
Airteagal 1(2)	Airteagal 2(3)
Airteagal 1(3)	Airteagal 2(5)
Airteagal 2	Airteagal 1
Airteagal 3	Airteagal 3
Airteagal 4(1)(a)	Airteagal 2(1)(a)
Airteagal 4(1)(b)	Airteagal 2(1)(b)(i)
Airteagal 4(1)(c)	Airteagal 2(1)(b)(ii)
Airteagal 4(1)(d)	Airteagal 2(1)(c)
Airteagal 4(2)	Airteagal 2(2)
Airteagal 4(3)	Airteagal 2(1)(b) agus (c)
Airteagal 4(3a)	Airteagal 2(1)(d), (e) agus (2)
---	Airteagal 2(6)
Airteagal 4(3b)	Airteagal 2(7)
Airteagal 4(3c)	Airteagal 2(1)(g) agus 2
Airteagal 4(4) agus (5)	Airteagal 2(3)(d)
Airteagal 4(6)	---
---	Airteagal 2(4)
---	Airteagal 4
---	Airteagal 5
---	Airteagal 6
---	Airteagal 7
---	Airteagal 8

Airteagal 5(1), (2) agus (3)	Airteagal 9 go hAirteagal 16
Airteagal 5(4)(a) agus (b)	Airteagal 17(2)
Airteagal 5(4)(c)	Airteagal 17(1)(b)
---	Airteagal 17(1)(a)
Airteagal 5(5)	Airteagal 18
Airteagal 5(6)	Airteagal 4
Airteagal 6	Airteagal 9 go hAirteagal 11
Airteagal 7(1) agus (2)	Airteagal 19 agus Airteagal 20
Airteagal 8(4)	Airteagal 21
Airteagal 7(3) go (7)	Airteagal 22 go hAirteagal 25
Airteagal 8(1) go (3)	Airteagal 26 agus Airteagal (27)(1) agus (2)
---	Airteagal 27(3)
Airteagal 8(5)	Airteagal 28
Airteagal 8(6)	Airteagal 4
Airteagal 8a (1) go (5)	Airteagal 29 go hAirteagal 34
Airteagal 8a(6)	Airteagal 4
Airteagal 8b (1) go (6)	Airteagal 35 go hAirteagal 39(2)
Airteagal 8b (7)	Airteagal 39(3) agus Airteagal 4
Airteagal 8c(1) go (10)	Airteagal 40 go hAirteagal 44
Airteagal 8c (11)	Airteagal 4
---	Airteagal 45 go hAirteagal 47
Airteagal 9	Airteagal 48 go hAirteagal 50
Airteagal 10(1) go (3)	Airteagal 51(1) agus (2)
---	Airteagal 51(3) go (5)
Airteagal 10(4)	Airteagal 51(6)
---	Airteagal 51(7) go (9)

Airteagal 10(5)	Airteagal 51(10)
---	Airteagal 52
---	Airteagal 53
---	Airteagal 54
---	Airteagal 55
Airteagal 11(1) go (3)	Airteagal 56(1) go (3)
Airteagal 11(4) go (5b)	---
Airteagal 11(6)	Airteagal 56(4)
Airteagal 12(1)	Airteagal 57
Airteagal 12(2)	---
Airteagal 13	Airteagal 58
Airteagal 14(1) go (3)	Airteagal 59
Airteagal 14(4) go (7)	Airteagal 60
Airteagal 15	Airteagal 61
Airteagal 16	Airteagal 62
---	Airteagal 63
Airteagal 17	Airteagal 64
Airteagal 18	Airteagal 65(1) go (5)
Airteagal 19	Airteagal 65(1) go (5)
Airteagal 20	Airteagal 66
Airteagal 21	Airteagal 67
Airteagal 22(1)	Airteagal 65(6)
Airteagal 22(2)	Airteagal 65(7)
Airteagal 22a	Airteagal 68
Airteagal 22b	Airteagal 69
Airteagal 23	Airteagal 70(1) agus (2)

---	Airteagal 70(3)
Airteagal 24 agus Airteagal 54	Airteagal 73
Airteagal 25	Airteagal 72
Airteagal 26	Airteagal 74
---	Airteagal 75
---	Airteagal 76
Airteagal 27(1) go (3)	Airteagal 77(1) go (3)
---	Airteagal 77(4) go (6)
---	Airteagal 78
---	Airteagal 79
---	Airteagal 80
Airteagal 28(1) agus (2)	Airteagal 81(1) agus (2)
---	Airteagal 81(3)
Airteagal 28(3) agus (4)	Airteagal 81(4) agus (5)
Airteagal 29(1) agus (2)	Airteagal 82(1) agus (2)
Airteagal 29(3)	---
Airteagal 30	Airteagal 83
Airteagal 31	Airteagal 84
Airteagal 32(1)	Airteagal 108(3)
Airteagal 32(2)	Airteagal 108(5)
Airteagal 33	Airteagal 85(1) go (5)
---	Airteagal 85(6)
Airteagal 34(1)	Airteagal 86(1) agus (2)
---	Airteagal 86(3)
Airteagal 34(2) agus (3)	Airteagal 86(4) agus (5)
Airteagal 35	Airteagal 87

Airteagal 36	Airteagal 88
Airteagal 37(1) go (3)	Airteagal 89(1) go (3)
---	Airteagal 89(4)
---	Airteagal 90
Airteagal 38(1) go (3)	Airteagal 91(1) go (3)
---	Airteagal 91(4)
Airteagal 39	---
---	Airteagal 92
Airteagal 40	Airteagal 93
Airteagal 41	Airteagal 94
Airteagal 42	Airteagal 95
Airteagal 43	Airteagal 96
Airteagal 44	Airteagal 97
Airteagal 45	Airteagal 98
Airteagal 46	Airteagal 99
Airteagal 47	Airteagal 100
Airteagal 48	Airteagal 101
Airteagal 49	Airteagal 102
Airteagal 50 agus Airteagal 51	Airteagal 103
Airteagal 52(1) go (3)	Airteagal 104
Airteagal 52(4)	Airteagal 65(6)
Airteagal 53(1) agus (2)	Airteagal 105(1) agus (2)
Airteagal 53(3)	Airteagal 65(6)
Airteagal 54	Airteagal 73
Airteagal 55	Airteagal 71
Airteagal 56	Airteagal 106

Airteagal 57	Airteagal 107
Airteagal 58(1) agus (2)	Airteagal 108(1) agus (2)
Airteagal 58(3)	Airteagal 108(4)
Airteagal 58(4)	Airteagal 121(2)
Airteagal 59(1) go (4)	Airteagal 109(1) go (4)
---	Airteagal 109(5)
Airteagal 59(5) go (11)	Airteagal 109(6) go (12)
Airteagal 60	Airteagal 110
Airteagal 61	Airteagal 111
---	Airteagal 112
Airteagal 62	Airteagal 113
Airteagal 63	Airteagal 114
Airteagal 64(1) go (5)	Airteagal 115(1) go (5)
---	Airteagal 115(6)
Airteagal 65	Airteagal 116
Airteagal 65a	---
---	Airteagal 117
Airteagal 66	Airteagal 118
---	Airteagal 119
Airteagal 67	---
Airteagal 68	Airteagal 120
---	Airteagal 121(1)
Airteagal 58(4)	Airteagal 121(2)
Airteagal 69	----
---	Airteagal 122
---	Airteagal 123

---	Airteagal 124
---	Airteagal 125
---	Airteagal 126
Airteagal 70	Airteagal 127